

西天目粗山志

卷首  
卷二

卷一

源委	建置	形勝	山紀	一卷	圖攷	誌序	首卷
	尊宿	陪扈	稽古			凡例	
	參請		名考			目錄	

ル 5  
1110  
1





門ル8  
號1110  
卷1-4

ル  
1110  
1

天  
租  
田





西天目祖凶志



光緒丙子臘八  
集成板存本寺

重葺西天目祖山志序

佛刹微塵數香水海在華藏世界中妙  
觀察智流出八德七珍清泰之邦並歷  
劫不壞其餘皆經阿那毗羅吹沫建立  
自飛霞而下金輪融結洞天福地綦布  
寰中太微元蓋洞淵所第爲三十四者



卽吾浙西天目是也其浮玉西峯諸名  
山海經等書言之詳矣厥後青藜金壺  
鉅公名人以次薈蕞求之金鎖有津逮  
焉姑不具論論其所以爲祖山者探阿  
耨湖崑崙度草坪滙雲海此山祖也高  
三千五百丈亘八百餘里爲浙西諸山

之祖此祖山也西四七東二三此祖也  
獅子巖落枕後尋得主人翁半邊鼻復  
於破甕邊摸着向上機不起于座成大  
寶坊此亦祖山也故但見山之或聳而  
妥或奇而折初不知有頓漸權實者盲  
與摸象同指山之谿訝而以爲黃龍第



序  
二  
二關指山之杳靄而以為汾陽第一訣  
見與擔板同離山之枯椿頑石而別求  
張弓輓毬離山之泉聲鳥語而別求打  
鼓振鈴迷與覓頭同然則茲山可以不  
志乎曰否否法離文字非離文字四十  
九年妙義慶喜現為結集矧峨嵋補陀

各有山志下逮黃蘗大梅類皆人以地  
傳卽謂前人筆脚具在不須復說獨不  
聞大智度論云譬如搖樹取果熟者前  
墮若未熟者更須後搖又如捕魚前網  
未得後網乃得此心海師創於前體公  
和尚增於後之一片婆心也余憶自因



地初却似與山水有緣比校書祕閣獲  
覩古今圖書集成凡天下名山大川悉  
如視掌中菴摩羅果厥願一邕午年奉  
使楚南絲燕山而保州而大梁而鄂渚  
而星沙所過勝區皆得遊目焉厥願又  
一邕至己酉告歸辦香天日窮日之力

直至老殿復左折西方菴而返雖鱗爪  
遺者或多而領珠已約畧得之厥願又  
一邕竊以爲初之所見夢游爾臥游爾  
次之所接傾耳蒐目若阿閼一現而旋  
已墮渺莽焉至是足目相資人境俱奪  
觀止矣顧或者謂脫去塵壒胸中之佳



山水自在又或謂妙明心中卽佳山水  
亦無受處然試將筆尖頭上和盤托出  
此山千奇百怪送到明眼人眼中纔一  
歛眸遂已窅然却與雲光素紙校勘有  
異同否固知體公悟入定當在未着陟  
釐時也昔宋仁宗語懷璉曰山卽如如  
體也嗚呼盡之矣

嘉慶八年歲次癸亥嘉平月上浣八摠  
居士羅錦森撰



西天目山志序

天目有二峯隸於潛者為西天目所謂  
 三十四太微元蓋洞天者也曩讀地志  
 諸書及之為之神往庚申歲余承乏潛  
 邑于今五年嘗因公造其地登禪源寺  
 恭睹



列聖御書憩息之餘僧輒導游諸勝全山之  
形頗領其要今年夏方丈體周謀重梓  
山志沿舊志而增刪之釐爲若干卷錄  
副本問序于余余白業未參釋藏尠閱  
其何以序雖然余守土官也固有不能  
已於言者竊思洞天之名昉於魏晉其

間如葛稚川許叔允之流修真相尚特  
美其稱唐宋以後元風寢微象教方廣  
世稱仙境半爲道場茲山其一也且天  
生名山用待游覽惜位於偏隅冠蓋之  
倫百難一至好游者扶筇蠟屐窮幽探  
奇代雖不乏亦蹇然足音矣夫以神仙



序  
蹈隱之地佛乃妙而有之士大夫罕游  
之區禪侶乃安而宅之又潛之地瘠山  
有恒產潛之民勤僧無劇勞佛譬之賢  
祖父而爲子孫謀者可云至矣吾觀佛  
法世法異跡同軌一經薙染宜勵精嚴  
諸僧伽生際

昇平離諸苦惱朝禪夜梵於意云何要惟  
當建精進幢發勇猛力淨六塵之界固  
八正之門託如來之法裔而共爲

盛世之幸民是則守土者所鄭重而付囑  
者歟至此志之義例品藻自有鉅公宗  
哲鑒定而是正之無俟乎贅



大清嘉慶九年夏六月穀旦知於潛縣

事山右雷發馨拜撰



西天目山志序

天目古稱浮玉發源於江南徽郡之黃山其曰西天目者所以別異於臨安之東天目也西伯而東仲龍飛鳳舞萃於錢塘實為武林諸山之祖則西天目固非潛邑所得而私也而潛邑適踞其麓



序  
觀夫磅礴鬱積滋涵滲漉以阜成乎民  
物者非茲山不爲功雖欲勿私之不可  
得已漢唐以來山不甚顯如柳州馬退  
山茅亭所云周王之馬跡不至謝公之  
屐齒不及巖徑蕭條登探者以爲歎殆  
若爲茲山慨也歷宋元明名勝漸啓逮

乎玉林國師身受

順治

康熙兩朝之殊遇大振高峯中峯之灑席而  
茲山之震耀暴著於當世者赫然改觀  
豈地以人重歟抑人以地靈歟兩相得  
而益彰蓋山亦似隨運會爲升降也山



頂有僊池取水其中辦香迎奉則雨余  
承乏茲土頃遭微旱舉行成法立霈甘  
霖盼嚮感通捷於桴鼓山靈其不我遐  
棄乎因思東坡倅杭時勘旱災至潛未  
得窮幽攬勝則以簡書之畏故也余才  
不逮蘇公而事理則一倘因禱旱而煩

徒役以快一人之遊覽是將事匪虔夫  
豈爲民請命之心耶顧靈境當前情難  
恣置而體公和尚以所修山志索序於  
余披覽全編不減臥遊之適昔昌黎作  
原道永叔因之爲本論期於衛聖道而  
正人心不爲不力乃韓公於文暢則嘉



其能喜文辭歐公於惟儼則曰考其筆  
墨馳騁文章瞻逸之能可以見其志矣  
初未嘗擯斥之弗與通也體公於二子  
安在古今人不相及乎乃不辭而爲之  
序至山之靈奧有未易更僕數者志已  
備詳之矣不復贅云

勅授文林郎知於潛縣事前充

咸安宮官學教習

四庫全書分校官蔣光弼撰

皆

嘉慶丙寅巧月朔後三日




西天目祖山志

凡例

- 一初志係阮子厚草創于萬曆辛巳迨甲寅邑宰徐嘉泰聘錢江令喬時敏增飾之以攷覈未詳至三修四修終未帖然崇禎戊寅心海師所輯祖山志理事諧暢今秉以為粉本略加圖乙而已
- 一稽古內震澤編前志所遺今本采入使知五月間龍與神會亦江漢朝宗之意
- 一臨濟正傳諸祖各有勘辯機語如水乳合始堪授受虎邱大慧同出一源前書誤將昭覺列隆祖下



西天目山志 戶名  
今為改正俾青藍瞭如庶不致倒裳而索領

一舊列陪扈諸山俱應芟去西天目為浙右輿圖之祖雁行者惟東目爾餘山環繞儼若兒孫至徑山稱天目之東北峯其懸雷石柱數處尚在左側聊為載入如畫家渲染法

一大覺國師之

恩遇寵渥稠疊古今罕匹所有

敕書墨寶留鎮本寺者理宜增入非圖焜耀誠欲令讀者信知靈山付囑有在也

一明太祖諭善世外另有申明之榜趨避之條乃普

天同錫非為斯山斯人而發故不錄

一天目禮禪師傳載臨安阮氏子薙髮於真相寺記

剪於靈隱松源厯主福泉天童等席歸寂梁渚西

上別傳皆作西

法嗣有橫川石林源流劃然並無

本山事蹟至參寥辯才所謂別出一支尤與吾山無涉今釐之與東林不取淵明同

一環翠白雲見峯各院舊隸雙清莊自大覺重輝祖席另行改建卽今之禪源乃其故址岷峨舊事不復可問

一舊收望夫石詩有雲鬢煙鬢與誰期一去天邊更



不歸之句見太平當塗志乃王荆公題望夫磯者  
非亡名氏也應刪之

一忠孝節義名教攸關吾宗妙用運水搬柴而已既  
已詳載邑乘茲不復贅

一志乘體異說郭紀談一門芟其善謔不特玉卮無  
當亦同稟綺語之戒云爾

一舊志尊宿止於無盡學今自大覺國師下續增先  
後住持二十三人或護覺王印或建尊勝幢拄杖  
子一一點出法乳常流覷破此山奇絕處同一鼻  
孔出氣

西天目祖山志目錄

卷之首

誌序

凡例

目錄

圖考

卷之一

山紀

稽古

名攷

形勝

陪扈

卷之二

建置

尊宿



參請

源委

卷之三

脩真

清信

棲逸

檀賢

廟祀

卷之四

御書

敕諭

表

劄

奏

疏

藏書

碑記

游紀

卷之五

賦

詩

歌

行

辭

卷之六

法語

開示

家訓

家風

名分

履踐

偈頌



卷之七

書問

說

論

辯

序

題跋

箴

卷之八

祭文

佛事

贊

銘

遺蹟

生殖

卷之末

休咎

靈異

紀譚

補遺

後跋




卷首


靈異

# 西天目山圖





山圖





北

南



禪源寺圖







西天目山禪源寺圖說

嘉慶二十年乙亥八月十八日副使一葦表君公餘  
閱山志見有山寺題名遂按各位次界畫遠近曲折  
前後高卑左右增繪於後以彰盡善噫是大有益志  
乘焉耳雲朗法月識

西天目祖山志卷之一

一三學院苾芻廣賓纂輯  
禪源寺住持際界增訂

山紀

探淵原於阿耨迦本宗於崑陵駿發南龍約  
十二萬蜿蜒之遠雄蟠西浙擬四十千巖巖  
之高沈寥擎玉柱之天修廣豁青蓮之目志

山紀

謹按三千大千世界約一四天下而言即以一日月  
所照臨中有山王高三百三十六萬里據金輪之



上是名須彌盧或稱妙高者也長阿含經云大雪  
山頂有池縱廣五十由旬西國傳云大地菩薩以  
願力故化爲龍王於中潛宅出清冷水屬瞻部洲  
是名阿耨達池也池從四面獸口流出各繞一而  
而入四海其東北或曰潛流下地出積石山卽徒  
多河是爲中國河源也十洲記云有山當西海之  
戌地北海之亥地山海經云其山縱廣萬里高萬  
一千里有青白赤黑之河環其墟是名崑崙崑崙  
實分三龍入震旦其南龍出吐蕃之西下麗江趨  
雲南繞霑益貴竹關嶺而東去沅陵復別爲三析

其一過庾嶺度草坪繇玉山蓼華峯頂分支道邗  
門至黃山而入浙之西北百六十餘里當潛臨孝  
豐之界翔鳳林過峽特起二峯屹立雲表一峙於  
臨安縣西五十里一峙於潛縣北四十五里峯頂  
各一池左右相望故名天目高三千五百丈或云  
三千六百丈三千九百丈大約延袤而五百五十  
里亘虎林苕霅古歙宣城環擁四州前橫三島上  
撐穹碧斗宿承墟下兀空青浙維敷鎮基構北盤  
乎震澤宗支東衍乎繇拳鍾王氣於錢塘奠雄藩  
於禹貢其體也巍巍乎峻紫極以配天其鑒也洞



洞乎擢青蓮以喻目山神是鹿旱魃爲霖雷震兒  
啼雲生海變半夜日上重陽雪飛每過八月高寒  
逼人不可復上矣西天目峯則有翠屏玉柱象鼻  
蓮華香爐旭日翔鳳昂霄巖則有觀音獅子千丈  
紫微元通響水並摩空兢上絕壁橫拳拳蘿與鬚  
木倒生蘚暈共霜痕巧蝕石則有曰城曰門曰屋  
曰版曰庵曰巷曰鼓曰龕曰碁曰屏曰臺曰鉢佛  
面七星眠牛新婦並肖像入神觸雲呈幻洞則有  
雷公龍穴真氣潮音池則有曰龍曰仙洗鉢洗眼  
獨角弄珠高湖翔鳳又十二險潭者竝神物所都

民天攸寄其生植則杉曰千秋松曰雨蓋竹曰實  
茶曰薜筍曰青藥曰朮花曰芫蔬曰石耳草曰龍  
鬚藤曰靈壽禽獸曰彘曰猯曰文雞曰石龍子如  
忉利雜樹和合福力所感也若其梁磴盤空亭崖  
陡截行者有彳亍攀躋之苦漸上則海市江帆空  
人心目而勸懲輒忘居者有恬幽朗廓之娛稍久  
則礪飲木食遺人身世而塵壒都消故老氏自西  
漢有棲之者非始於張道陵也道陵直家之耳佛  
氏自晉之法曠唐之慧琳始然有過化有生緣有  
受業至勝國原妙則宏其道上首明本則始大其



家賜額爲獅子大伽藍代不乏人天師表真俗法  
檀暨彼絳節天游黃庭羽化者巖扉畱不死之丹  
鳥路接無生之梵矣儒則若宋之洪咨夔隱則若  
漢之先生梁之周沈優婆塞若晉之董吉等得非  
繼往開來託茲山之靈秀戴高履厚標終古之英  
明者哉宅山墘隴有編氓焉其俗不牧驢騾羊豕  
谿澗不汙其人不事釣弋虞羅卵胎勿歿惟業茗  
樵楮漆以自資猶存素朴醕醢以自適疑去古之  
未遠者獨其土田磽瘠民齒煩艱下湫屢厄於汎  
洪高峪恒饑於旱暵兼以麓產礦銀時遭劫燒或

詔開而導利或寇發以稱兵而此山者南圻靈艮  
鑿之則武林地脉有傷都會祖龍劓之乃浙省人  
文就瘁豈直埽藂林其如燬未繇力者之負趨敝  
巖穴於不支徒切賈生之痛哭而已然幸此山不  
附郊坳不便郵驛祀典不叅五嶽封銜不顯三吳  
致禹航秦望轍迹所未侵謝客遷游屐痕所未踐  
近如白傅坡仙歷年爲郡藻飾未經乎染翰幽探  
亦漏乎支筇詎匪西湖媚如西子雖要車馬之迷  
城實借雲蘿之外護乃遂其超然物表宛若劫初  
如太公未遇垂釣殷周之際也如夫子固窮絃歌



陳蔡之間也亦如逃名之隱卻死之仙閱萬古以鎮常叅兩間而壁立者乎諸凡傳攷臚列如左

稽古

取宋證殷視今猶昔名山信史杼冰繭之絲  
絲蕪海成言析梅檀之片片全身半偈千載

數人志稽古

杭州府舊志云

漢武帝元封二年置於潛縣屬丹陽郡吳寶鼎元年割於潛縣地屬浙天

目山隸焉

佛藏宏明集云

漢明帝永平中摩騰竺法蘭以佛經西至天目羽流同九山道士抱遺經

相角試為灰燼

老聃云

欲度南極避水蓄天目海陵最為第一

山海經

天目一名浮玉山北望具區東望諸崑高遠深潤若水出其陰

圖經云

天目山有三十六洞每秋必有一月風雨晦冥土俗謂是山神與江神會也 又云

茗溪發源天目涉於潛臨安二縣夾岸多茗花每秋風飄散水上如雪飛故名

郭景純記云

天目山前兩乳長龍飛鳳舞到錢唐海門更點巽峯起五百年間出帝王

高僧傳

天目其高三千丈周圍三百里與天柱廬阜等相儔匹上有二湖謂左右目登陟險阻數

日乃到巔頂多蛟龍池潭三所最上池人不可近氣臭逆人不可久視又山神作白鹿形每五月與

震澤龍會必多風雨又云天目山特秀基墟跨陟四郡有上下龍潭深不可測怪物往往出其中

洞淵集

第三十四洞天曰天目山有兩目左目高二千丈右目二千五百丈周圍一百里名太微

元蓋洞天



太平寰宇記

天目山高三千九百丈廣五百五十里

趨於潛為紫谿合桐廬之水以滙於浙江

水經註

浙江水出吳興郡於潛縣北天目山山極高峻崖嶺竦疊西臨後澗山上有霜木皆是數百年樹謂之翔鳳林東面有瀑布下注數畝深沼名曰蛟龍池水南流逕縣西為縣之西谿谿水又東南與紫谿合水出縣西百丈山即澗山也山水東南流名為紫谿中道挾水有紫色盤石石長數百餘丈望之如朝霞又名此水為赤瀨以倒影在水故也紫谿又東南連山挾水兩峯交峙反頂對石往往相捍十餘里中積石磊砢相挾而上澗下白砂細石狀若霜雪水木相映泉石爭暉名曰樓林

楊公三龍經

海門環合似天市天目天池生侍衛

吳越王錢鏐記

大江之南地兼吳越其峯巒西按兩

浙江之迢派可謂水清山秀兼通大海及諸國往還

樂史寰宇記

千丈勢連錢唐

金璧元文

大江以南之龍其脉起自岷山遶行而西自西而南至雲南之境又東趨夜郎踰桂

嶺至零陵為九疑山入桂連過大庾嶺出南雄繇汀從邵武抵信走徽東行為天目一枝為錢唐

廖氏曰

大江以南天目似海市

仁山金氏中國山水論畧

岷山江源夾江南支即南趨為蒙蔡諸山青衣大渡

馬湖江諸源又東包涪黔一盤而北為三峽其出者包絡九江之源中盤中為衡山其再盤而北為廬阜其嶺之東出者又為袁吉章貢時信諸江之源至分水魚梁嶺三盤而北趨過新安時天目盡昇潤再盤之間其水聚洞庭三盤之間其水聚彭蠡三盤以東則南為閩浙北為震澤此南絡也

吳興記

天目山極高峻頂有泉水甚潔東南有瀑布下注數畝



古杭雜記

高宗中興建都臨安天目乃主山武林紀事亦載云

宋會典云

天目山遣使投龍簡處建道場設醮唐地志亦云

唐子霞云

天目連亘杭湖徽寧周圍三千里有養生之藥著草芫花皆名著仙經所著有天目

真鏡錄

蘇子瞻表忠觀碑

天目之山茗水出焉龍飛鳳舞萃于臨安

吳泳興聖萬壽寺記

國家駐蹕臨安自西天目龍翔鳳舞舒岡布麓盤結而為帝王

之都者錢唐也自東天目熊騰馬奔凌深拔峭發越而為梵釋之宮者徑山也山以徑名乃天目之徑路其地尊故鬼神不敢宅其境勝故凡庶不得居必也以大法力建大道場然後能儲精會秀攬光景而納於其中

邵文炳記

天目之源幽深峻極停為飛淵三池醜流

李廷忠記

潛之水發源天目山高水悍凌岸觸石涌遇霖潦浸淫洪濤稽天如猛獸之扶奔迅雷之鼓怒矧磔輒觀者愕立

詠縣八景詩

盡日行山更有山於潛正在萬山間北連天目開丹井南控浮雲擁翠鬢

袞繡堂記

天目其俗儉而質其民勁而武

遯齋閒覽云

昔登天目山北遇雨但見雲霧如在山腰

朱文公熹山論

江南諸山皆祖於岷江出岷山岷山夾江兩岸而行邗邊一支去為江北

許多去處這邊一支分散為湖南閩廣盡於兩浙建康一支為衡山而盡洞庭九江之西其一支度桂嶺則包湘源而北經袁筠之地以盡于廬阜其一支自南而東則包彭蠡之源度歙黃山以盡建康又自天目山分一支盡於浙江西之山

成無玷記

茗溪發源天目經兩郡六邑以入於具區



大明一統志

天目為道家第三十四洞  
天山下兩池若左右眼

劉誠意伯基天機會元注

崑崙東南南狐角分條自康  
姑九萬八千七百五十里

出西羌天竺西番南界曰六國山之北一萬二千  
里通巴蜀之巖鵬山分枝三派南股歷雍思入東  
蜀之南過東北起平華頂分二股左股過四川之  
東北至雷磨山起二枝一枝入廣西與辰州之北  
界合行過東梅峯北角入建者過潛陽山起祖歷  
鉛山其左股一條踰玉山蓼花峯起頂出三條一  
條自祁門入至浙江臨安之西起天目甲卯行龍  
為兌氣入首至古杭左迴右抱合氣結穴為錢唐  
其左股歷阜亭至海鹽入海而止  
經歷十一萬九千六百五十里

吳興掌故集

天目高三萬六千尺廣八百里有仙仗  
峯千丈巖蛟龍池東西天湖從臨安入

疎豁可行高峯和尚道場在焉有趙孟頫大覺正  
等禪寺碑從孝豐入深僻不易釋皎然有題山中  
寒氣早嚴先冬而作山僧九月即不敢出三月後  
可通行上有紫陽觀梁大同五年建昭明太子勒

夏時勝槩記

錢唐分野在斗疆域則揚州形勝則自  
天目龍飛鳳舞歇落江湖鍾靈於人物

古今不乏

薛應旂天目山志

東南瀑布噴注為池名蛟龍池又  
有三池池上有潭如仰箕曰箕潭

溢而入者曰上池懸崖五十仞上有石壁如門其  
環流而下者曰中池垂崖三十餘仞歎涌如雷飛  
流而下注者曰下池其深莫測溢於大徑口小徑  
口又西南流過於潛經紫溪踰七十二灘會桐廬  
以入  
浙江

陳善郡志序

按天目奇麗秀絕甲於郡中其峯巒之  
詭異如獅象金猊石磴之玲瓏若神工

鬼斧誠名勝之奧  
區神仙之窟宅也

田汝成游覽志

錢唐西湖諸山之脉皆宗天目天目  
西去府治一百七十里蜿蜒東來凌



深拔峭舒岡布麓若舞若翔  
萃於錢唐而嶮崿於天竺

吳仲文天目志序

吳山西湖臺榭鱗循芳卉雜植猶名姝託五達之衢綴以金珠披以

錦綺令人神怡而目眩若西目則質任天成無異閩闕之處子有難熟睨者即貞素之自然較鉛華

之禮治殆加一等矣

李道南記

天目金仙頂奇觀哉俯仰之間不知其身之高地之迴真若脫出風埃之外可以仿

日月而襟海嶽也

梁學顏記

玉柱峯直插雲漢四圍如削氣崒崒而體勢嶮峻而色古上有龍爪松二鬱盤蒙

翳橫柯不聳如芝孤生更多綺樹蟻蛭虬螭重陰攢映所謂臨巖不覺千峯渺近日猶禁六月寒者

為之婆娑其下

洪瞻祖西溪志

梅山是皇夾室龍門禘於天目

徐善繼地學統宗

南龍之次有臨安其龍脈自天目山分入錢唐而海門有龕楮二山

在其

虞淳熙錢唐論

黃山之為天都者三其自天目龍飛鳳舞萃於錢唐者三天都之一也

震澤編云

太湖之山發源自天目而來奔騰至宜興入太湖融為諸山湖之西北為山十有四

馬蹟最大

名攷

夫正則言順譌繇俗沿稱謂溷淆不可不稽

也古有按池以鳥名而知鴈宕問鏡何乾德

而辯蜀年寧諉闕疑是資旁究志名考

天目一名浮玉

山海經浮玉山茗水出其陰



一名天眼

唐釋慧琳傳師入天眼二十餘年天眼即  
天目也上有二湖謂為左右目錢武肅王

記亦曰其峯巒西  
按兩天眼之龍源

亦名西山

晉許邁傳永和初移入臨安  
西山登巖茹芝有終焉之志

亦名西峯

唐釋洪諲傳大中  
初乃還天目西峯

以巨源彰名

太平寰宇記水因山曲折  
東西巨源若目故名天目

以頂池彰名

元和志天目有兩峯峯頂各一池左右  
相對故名又一統志山下有兩池如左

目右

立天為名以標奇特

吳越王錢鏐記東西天目得非  
抗蒼崖於穹昊聳絕壑於雲霄

立天為名以  
標奇特耳

以江南全體得名

天都潘之恒論或舉江南全體黃  
山為首天目為目五湖為臟腑金

焦為足語雖太  
奇亦頗足據

以昭明洗眼得名

俗傳梁昭明分經失視洗池水以  
復明因名天目不知大藏漢永平

年已載其名  
真無稽可據

鑑喻釋名

論云兩天目祖黃山而表三  
吳如懸鑑在上故稱天目

蓮喻釋名

論云西頂有石如青蓮開敷楞嚴謂青  
蓮華目亦在佛面以此受名猶嫌有相

星有同名

黃帝太乙密推云當視太乙與天目在四  
維法當巡狩又太乙纂要云文昌六星在

北斗魁前天乙之府乃  
為天乙之目故曰天目

山有同名

廣輿記河南汝寧府信陽州有天  
目山又四川保寧府亦有天目山

形勝

突兀巨靈鬱葱佳氣獅踞象馴蛻三祖四仙



之窟龍飛鳳舞雄五王七帝之都大哉祖錢  
唐彌斥鹵者其惟茲山乎志形勝

峯

旭日峯

在禪源寺東插漢筍翹飛淙雪逆名以曦御出當其巔

陽和峯

在禪源寺左截雲高攬冰雪易晞有岡有菴同名陽和

昭明峯

在太子菴後昔昭明太子分經其下因名下有洗眼池

紫微峯

在寺西翠逼三垣羣瞻且拱其下巖曰紫幙亦曰虎山

鼓閣峯

在東陽庵前分支峭兀如雞仰足

三才峯

在攢玉峯下三峯品卓首出羣崖之上

攢玉峯

在立玉亭東屹立千霄擁石筍數百隱鱗崩劣宛乎綴玉

翠屏峯

在開山殿後迤邐綺張為浮玉禪藂之右障

棲雲峯

在藏雲塔東層巒窈窕如雲生態

翔鳳峯

在法雲塔後岡垂兩翼聳壑昂霄稠木宥生懸崖峭舉遠望此峰恒有落勢

玉柱峯

在中峯西其圍二十餘丈高倍之上銳下豐編梯可陟俯眺錢唐江流如帶上有虬松古

蘇綺秀錯然亦名望江石

象鼻峯

在重雲塔南與獅子巖相峙四宥奇峭高捲天半中有石乳下垂酷如象鼻舊傳白獺玉

瓶沈香三異藏此

香鑪峯

在活埋庵前孤挺摩空宥臨峻壑將雨則靈靄籠其上或湧如車馬蓋氣聯諸洞也

五嶽峯

在圍屏石上嶙峋指列簇如芙蓉

華石峯

在東陽庵南瑩斷雲根華滋炫目



聳壑峯

在立玉亭北西方庵東獨撐羣表困壑下傾其上多偃松插崖如綴坻無撮土霜鬣恒青

西來峯

從幻住庵緣援以下其高數百丈亭亭秀整如水上蓮

瀛王峯

在真際亭後取名麗駢馬事故與獅巖象鼻

寤真峯

在重雲塔前與獅巖象鼻鼎足者死關舫室在焉

浮圖峯

在金仙庵西層沓如七級然

迎仙峯

在堆玉礪上石拱若前趨者

聚仙峯

在迎仙峯右羣巒勢合笙鶴時過

昇仙峯

在聚仙峯下頂平下削傳徐五仙於此上昇

仙童峯

四仙臺左 仙女峯 四仙臺右雙侍有婉孌之態

昂霄峯

在金仙絕頂直上鄰虛

天柱峯

在絕頂暨二石如柱擊之聲清越古有天下奇觀字鐫其上

蓮花峯

在西麓眾峯瓣瓣攢若芙蕖別一天也約二十餘里皆松杉森蔭晨光隔暉有大覺正等

禪寺即兩浙運使松江瞿霆發所建舊有五鳳樓萬壽宮屢為兵燹所燬今廢為子院其峯之東北即無門菴焉

巖

翠微巖

在南麓有茂樹脩篁異花靈藥有亭曰倚翠

響水巖

在倚翠亭旁仄臨澗上水聲泠泠若自巖中所出者

紫微巖

在寺西紫微峯下

觀音巖

在半山橋上巖有二上下相去百餘武約高數百尺左右前有石類淨餅鸚哥善財拜者

獅子巖

在開山殿之西巖首嶄然昂起如狻猊狀昔記異僧嘗指為西來獅子座故名下為干丈



巖高峯老祖  
遺蛻在茲

蟠龍巖 在悟道亭下有宛轉虬螭之勢

伏虎巖 在法雲塔右其石蹲踞如臥虎之形

千丈巖 在獅子巖開山祖塔之下壁立千仞俯視膽悸

芝巖 在峯頂西昔嘗見有五色芝產於其上

元通巖 在西方庵後高數千尺中裂石巷可通其庵

龍門巖 在攢玉峯東竦然壁劃為門峻險不通樵採

松巖 在山南明空院後

石

石城 在峯頂西高數丈廣袤五百餘尺外垣中險肖城之大小塹云

石門 在半峯脊東西各一高者二百餘尺小亦百尺從張公舍眺其左右對啟為絕致也古記云西

烏崦 落暉未張於錦繪東

石屋 近張公舍腥雲怪風時或畫作

石庵 在絕頂四疊小石以巨石皮之又小石菴在頂東北側石疊成容一人坐臥或云徐仙誦經處

石版 峯頂及西北皆有之長短大小不一平淨如砥有全解者解未盡者倒解者鋸痕界道均明如

按繩墨有解至半者輒有奇變架之有欲昇去者輒有奇變

石巷 在張公洞去二百餘丈藤木蔭翳可畏穿石罅深五十餘丈

石龕 在西方菴前僅堪結跌坐雨雪不濡

石倉 在山西坎石羣

石鼓 出西嶺百武外有石如鼓扣之聲若神鉦



七星石

在今禪源寺前巨石

新婦石

在峯左高五丈許與東目

鐘樓石

在半山之岡數丈

眠牛石

在觀音巖上石臥類牛形舊

圍棋石

在峯北杵約數尺平潤不

圍屏石

在雲深塔西北削壁數摺展如屏展前有三

痕三四寸

仙臺石

在圍屏石前光澤平正復有解石二

天關石

在圍屏石上方而大

佛面石

在象鼻鉢盂石下有真氣洞

淨餅石

觀音巖

按劍石

並在昇仙峯左右一

仙容石

在石門西上鐫

勒銘石

在龍池石東上

醉仙石

在仙容石西並

金雞石

在金仙庵西岡直豎二丈許徑一尋一

洞

雷公洞

在開山殿前

龍穴洞

在開山殿下穴不逾數尺外若有

真空洞

在獅子巖下

潮音洞

在眠牛

在天目山志

卷一

形勝

七



真氣洞 在普同塔前鉢盂峯下  
細縷第第時從中出

臺壇坪舍

望江臺 在玉柱峯東高數百尺如壘如城

四仙臺 在金仙庵東傳為真君步虛處

蓮華臺 在著衣亭前平廣數百餘尺以四下峯瓣如簇故目之

禮祖臺 在髮塔下幻住嘗居立玉亭叅徒欲見無繇於此禮之又舊名拜將臺今廢

新月臺 在開山殿之西即古禪堂址

仙壇 在雲封庵北去十餘丈許邁禮斗處 古坪 在着衣亭下

張公舍 在獅子巖西峭壁間高丈餘深可五丈縱二十餘丈欹崖上皮傳張道陵舊廬旁有煉丹池

池

仙池 在西尖絕頂深廣各二尺餘大旱不涸久雨不溢每歲旱四方皆請他水虔禱即雨雨後即送池內

丹池 在張公洞西崖下時有神魚異形四足鼓鬣羣游吐氣作雲即張道陵煉丹處

洗眼池 在昭明峯下扁曰靈沼即昭明分經處

盥池 在真際亭西炎涇不竭禮祖塔者致潔乃進

洗鉢池 在張公舍上昔高峯禪師浣鉢之所

龍池 有三俱在東北峯下大小徑口二溪有潭如仰箕名箕潭中有巨石潭水注入上池在山東垂崖下高五十仞上有平地數丈名拜斗壇石壁如

門以限水之出巨川泛溢則激而反趨於寧川故山前無水患崖間有石獅下瞰可據而視水流入中池又在垂崖下噴瀉如雷飛濺崖壁下池接焉

形勝



周迴三十餘丈紺深莫測三面皆駢石環遶南入大溪歷紫溪七十二灘皆發於此岩下有滴乳可

以療疾宋時旱潦嘗遣使函幣精禱投之于池澌洞汭流而上既乃下沈如有物挈之狀或少慢復

浮而出凡禱者皆然上有格思亭下有石倉潭浮溪潭

弄珠池 飛流濺沫噴瀉如珠焉 在高湖龍池 在孝豐界其神極靈春秋祀事

獨角龍池 在蓮華 高湖龍池 在孝豐界其神極靈春秋祀事

翔鳳林 在東北峯峻拔類天柱其上平地一千五百尺中有天湖產異魚人莫能捕或云潛龍也

水分下注東出蘇湖南趨杭郡西赴宣城北流安至罕

東隴 在觀音巖東有庵甚明潔萬厯間北僧無盡禪師葺以接待雲水凡循方禮塔有所憩止今為

大覺國師塔院焉

木竹隴 在東隴之南幽徑負絕游屐不可得到

何佳隴 在西麓有長春隴 在西麓洪氏可菴東無考

灑水隴 在金門庵有長春隴 在西麓洪氏可菴東無考

岡

赦書岡 在荆門庵東相傳高麗王遺事故名

陽和岡 在東隴東上有紗帽石及陽和庵

斷龍岡 在峯頂南松隱禪師塔之上古記秦始皇所鑿

睂峯岡 在北麓從孝豐登山者必繇之

潭



仰箕潭 在東北峯下垂

石倉潭 格思亭下泓澄可鑑水自

乳水潭 廣一丈去下潭不遠味甘色白

十二險潭 西峯北麓界連孝豐潭歷十二險每險石

翻騰或旋風吼怒說者為龍神所都

谿

東關谿 在東天目之西發源泥嶺北

西關谿 在東天目之西發源泥嶺北

東合襟也

雙清谿 在南麓發源本山合六谿

政清谿 在西麓發源酒水鴨經蓮華峯出大有村與

與東西二關水合又為天目之西合襟也二水出白鶴溪

洪流迅溢其奔騰砰湃之勢無異胥濤故溪田多

水患如小旱則堰難之高處疏以灌田大旱則源

竭而無秋惟後亦天目之西流至元雷山麓

又合為一循紫

溪以達桐江

元通谿 在西方庵後元通巖

清涼谿 在真際亭東發源雲深塔西橋

悟真谿 在獅子巖下發源

流霞谿 在水閣灣從紫霞庵

昭明谿 在太子庵前發源昭明峯由登

在天橋出蟠龍橋與諸谿合流



堆玉礧 在西尖下有東西堆玉礧

飛虹礧 在西尖北孝豐界舊名中溪灘

路

寺路 於禪源寺後至開山殿曲折而上約三千七百

文浩倡緣贊石而秋化首王福完同僧圓福德俊

為幻住為西方庵為雲深塔為剔燈庵為法雲塔

為普同塔為玉柱峯立玉亭由着衣亭右級而上

各據形勝等一橫過耳由開山殿復上

南路 自於潛出北門經山口天目寺

東路 由臨安新溪東天目之麓經門嶺朱頭

西路 從千秋關或溪西經蓮

北路 本孝豐宣城之界經青嶺菴大洋灣上

陪扈

居有德鄰客維賢主山其猶人乎故親則曰

祖分列儼若兒孫尊則稱王環拱紛如護衛

賦海者以左右前後言之義始全紀山亦應

作如是觀志陪扈

東天目山 去西麓二十里高三千九百丈絕頂為大

峯寶珠峯瀑布泉白龍池蕭梁太子統嘗節金剛

池日洗眼 諸名蹟

徑山 在東七十里天目龍潛於此蓋入雙目之徑故

名最上為凌霄峯中為古龍湫今為香雲寺周



而五峯曰大人宴坐  
鵬搏朝陽堆珠也

**峯嶸山** 在南三十五里一名小飛來高六十丈崖聳  
清絕下浸碧溪有環翠巘遙望天目東西有

石壁高五十丈其巔舊  
有崇壽院麓有乳泉

**懸雷山** 在南三十五里一名觀山上有井傳許邁所  
鑿宋趙星渚讀書處左挹天目右瞰浮溪羣

峯環朝綺繡交錯元趙子昂徐  
震翁游此書翠微明秀二亭額

**石柱山** 在南三十五里上有石柱高二丈許有古篆  
文或云秦刻南連金鷲山有潛溪館寂照寺

東坡題綠筠  
軒野翁亭處

論曰海內名山各專厥美繁如紀載予不具論  
茲西天目者環控四州峭拔萬仞嶮崿以支圓碧  
培塿以覘羣青溯黃山為小宗耦東目為伯氏原  
其脈也繇唐昌竹嶺交潛州之白沙關計四十五  
里抵豪千關自豪千崛起為此山之金仙頂積三  
十里至臨安之泥陽約六十里交新城之青牛嶺  
又六十里次富陽之踢石嶺二十里屆餘杭之由  
拳嶺三十里次錢唐之分金嶺循五朝龍門五雲  
歷南高峯慈雲嶺迤邐乃仁和之鳳凰山越埠三  
十積六十有五至海寧之禪機山赭山又一百八



十里止海鹽之澉山蓋本三天都之一紀蜿蜒而起伏者九王氣萃於錢唐其支益爲豐衍韶秀趨與水會暎發江湖屏翰都會當不讓匡廬之九疊武夷之九曲已也夫匡廬之勝水在脇武夷之勝水在心吾西目之勝水在乳末雖大川巨浸不於其身然其條榦委蛇有天台之富麗峯巒詭異有龍湫之變體凡浙中名勝茲山足以兼之矧自半山橋以上奇絕者曰石曰巖曰峭壁曰松曰杉曰雲氣種種非他山所敢望也惜乎秦漢往牒杳不可尋卽子霞眞鏡錄亦恨不一見唐地志宋會典

第云遣使投龍簡至如安縣尉之銘吳左轄之詠曰雨曰暘靈應如響奈何大蘇行縣杖履不聞南宋行都柴望不及豈亦山靈自負有遇不遇哉祀典曠而勿稽表章縣而有待是在後之君子予不能無深望焉

西天目祖山志卷之一



西天目祖山志 卷一 三

西天目祖山志卷之二

三學院苾芻廣賓纂輯  
禪源寺住持際界增訂

建置

八萬歲壞劫未至五百年名山一開遷變方  
隅相因不住其閒琳宮梵宇興廢廢興似有  
不變不遷者與轆轤俱無竟耳志建置

禪源寺

在於昭明旭日翠微陽和羣峯之下即舊時  
雙清莊址

國朝康熙乙巳浙直宰官護法敦請玉林國師重興  
高峯道場時禪堂寮舍無幾存甲乙子院凡十六  
畜雞鶩豢豕豕至有醉酒罵巷者師知惡習已久  
且未為誠斥其中有一二老成知愧者念與禪寮



共處究非兩便或思別構或欲他徙有曲全叢席之意師知之令以房室產土隨直取價以償之餘院亦漸珠還緣重闢甬道以啟門徑增新移舊漸復叢林其各子院堂樓名目無所稽攷故皆不載至雍正十一年賜禪源寺額迄今式煥焉

**師子正宗禪寺** 在西目半山獅子巖左崖洞幽奇松

龍鬚翦荆剷險以居檀信洪喬祖首輸材力傑構禪叢斷崖中峯相繼宗風鼎盛致藩王忘躬參之遠而仁宗加錫子之蕃具見碑傳延祐七年賜額孟頫趙公撰記元末燬於兵明洪武四年松隱禪師復尋舊址手葺之越九年西域善世禪師奉旨來游名緇益集至二十四年立為叢林于中創建諸師竝詳於錢唐木訥撰記至明末復燬於兵屆康熙四年請大覺國師重興法席就於山下雙清莊改建一新乃移額於茲今之開山殿即其故址

**大覺正等禪寺** 在蓮華峯自麓登山約十有五里松檜森陰仰不見日至元辛卯浙運使

松江瞿霆發施建至壬辰請賜今額延僧祖雍權攝寺事尋命僧永泰住持有五鳳樓諸天閣藏經可觀樓元末燬於兵明洪武十年釋隆潛重建永樂元年洪水崩壞於寺基至十二年僧宗顧深患驚坍遠蹠於山麓莊所即今之所謂大覺寺是也宏治七年知府梁萬鍾恢復舊址重葺大殿及禪堂寮廡萬厯甲寅歲欽差魏監賜道經一藏敕諭護持明末復燬今為子院

**褒忠院** 在山東麓去朱頭陀嶺半里許院倚山岡唐

額保福洪忠文公讀書於此藏書一萬三千卷理宗賜為香火院易名褒忠元季兵燬移建於舊院基之東今尚存焉

**明空院** 在山南十里許唐文德五年建名興平上有

鐙禪師翼印以說法被遇理宗御書松巖及方丈四字并製頂相贊以寵賚之嘉熙間建閣安奉雙清莊有奇立莊於南麓因昭明太子故事得名事



載四祠堂記元末兵燹碑不可攷明洪熙改元僧智粵重建僧道玲增復常住田三百畝山場四頃見木訥記後有照空者于莊所建立禪堂接待方來見姚思仁記後分子院十六蕃衍五十餘寮至

康熙五年悉歸禪源即其莊所

重雲塏亦名開山在千丈巖高峯大師塏全身於此元貞乙未特贈佛日普明廣濟禪師塏曰重

雲眉山家之巽撰銘

雲深塏在開山殿西乃斷崖禪師入寂處虞學士集禪師元末兵燹今

禪師元末兵燹今重建門有千秋樹

法雲塏在望江石距重雲里許中峯和尚幻憩其中天應乙巳文宗賜今額敕奎章學士虞集為

銘後丁兵燹至明興重建像設崇奉焉

藏雲塏在普同塏左一名悟道庵

普同塏在法雲塏下即本寺僧伽閣維藏蛻之宰堵波也

髮塏在著衣亭前西域板的達禪師禮祖塏嘗剪髮藏於此

金仙庵在仙頂之西二里許香爐凝靄紫蓋浮陰亦名仙殿為西竺古先生遂宇也萬歷中蜀僧

寶印居之嘗供清涼峩眉然四指有密行頗諳密部及終以幻身如薩埵王子施其虎焉

雲封庵在開山殿西即許遠游之舊隱其山勢外平內敞俯瞰羣巒芬如騰驥廢

西來庵在谷川取西來獅名

景疎庵在師子巖見廣錄

幻住庵在西方庵上中峯和尚冥坐草廬也師自稱幻子凡所止處名幻住此其一也

活埋庵在師子巖南岡巒竹樹窅然深秀前為香爐峯後為趺坐石幻住和尚嘗禪寂石上瀋王

真際謂我師其活埋於此乎遂以名庵今廢



西方庵 從圓通巖下盤嶠西走有巨石青空突兀庵

相繼禪 宴於此

太子庵 在今寺之西北昭明

一峯雲外庵 在半山橋上天如和尚有詠嘉

青嶺庵 在西北湯公山北達宛陵

圓照庵 在天目嶼鳴幻住有

慧明庵 在巒黃山趾延祐甲寅谷

東隴庵 在攢玉峯南萬歷中燕僧無盡

紫霞庵 在東北一名水閣灣時有夕

中雲庵 在雲封上萬歷間紫柏大師憩錫

臥雲庵 在開山殿後取臥雲

萬峯庵 在外橫塘馬鞍山上元純

華嚴庵 在雲深東北蜀僧貝林日游

湧泉庵 在活埋庵後泉注半

古貧庵 在髮墟西蜀僧怪夫一字峩川居之

翠雲庵 在開山殿東北川僧古道

尸居庵 在中雲前吳郡王芥庵

諸頂庵 在華嚴上獨據高寒俯掀

草庵 在振衣 望雲庵 在著衣

剔燈庵 在開山殿後今為

晦石和尚塏院

建置



西禪庵 在玉柱峯

金蓮庵 在東陽庵左無考

西彌庵 在西岡下

黑雅庵 在西岡外久廢

眉山庵 在西麓眉山頂豫章陳安節與僧福映創舊名開化院今廢

荆門庵 在何佳陽諸巒翠削四壁雲蒸屐跡罕至南谷和尚建塢庵右

南庵 在南麓去寺里餘左有形山和尚塢

紫草庵 僻居巖麓茜草蒙茸今為廢坵故址尚存粟莽營塢於下

西陽庵 在泗水陽之北松隱禪師塢在茲

高湖庵 在翔鳳林北麓孝豐界旁有龍王祠

大洋庵 在寧國界要路往來者聊可憩息

西池庵 在山東麓旁有弄珠池潮音洞泉石諸勝東為仙姑石平砥可坐百人以左控龍潭故名

昔為洪忠文公別業

可庵 在西麓近長春陽洪逸民彥積讀書處泉石峯巒各有奇狀宋侍郎俞烈有記元末燬於兵今

指迷其所 無門菴 蓮華峯北宋無門開道者駐錫處旁有獨角龍王祠

幻隱庵 在褒忠之東康熙初年僧行隆建即屏石師也

西蓮庵 在蓮華峯南僧明重建嘉慶初僧普明重建

廣福庵 在孝豐界高湖庵之北

陽和庵 在陽和峯東 新庵 在無門庵西南僧龍音創建

紫陽宮 開山殿東北梁大同五年後改三觀堂久廢

至道宮 在龍池外舊有拜斗臺格思亭晉許元叔修煉之墟也

萬壽宮 在蓮華峯今復僧院



天王殿 內懸禪源寺及師子正宗

韋馱殿 乾隆五十八年重建 經行堂 五十九年廊房一

大佛殿 上懸敬佛二字 藥師殿 大殿東嘉慶七年

戒堂 在大殿西偏嘉慶五年

法堂 在大殿後上為御書閣內供大覺

方丈 在法堂東偏 禪堂 在法堂

三祖堂 在法堂後內供九祖像上為涵輝樓

追遠堂 在祖堂東內列西天東土正傳諸祖

西方丈 為晚香閣 蒙堂 西方丈之西為

藏樓 方丈東隅 七間樓 方丈東偏

香積海 在齋堂

庫房 在齋堂

官客堂 在前殿

上客堂 行道處左即

內客堂 在戒

倉房 在庫房

水碓 在倉房南

東園 浴室

三觀堂 在開山殿東北即紫陽

五鳳樓 大覺寺

齋堂 在藥師

客堂 在前殿

尊客堂 在官客堂

西客堂 在行道

焙房 在客堂

茶房 在七間

浴室 在西客

牲房 在大山門外

可觀樓 俱在蓮華



復閣 飛雲閣 俱在開

聞復閣 在褒忠寺昔洪忠文公藏書處

宣明室 至大間重

舫室 即飛雲閣之別名

旅泊室 至大間俊用二公葺幻住有記

存心室 在山頂天如有詠

待月軒 萬松軒 並蓮華峯

松軒 在明院

梭龕 在寺右籜冠道人陳大乾隱居所築

山舟 在景疎庵至大中直翁創

洪氏山房 今褒忠寺

孫氏山房 在玉柱峯吳郡孫見田建已廢

悟道亭 旁有悟道松 幻住遺跡

西山亭 在山麓宋洪景盧有記

真際亭 東陟開山殿西達重雲瀋王建因名

立玉亭 幻住菴南峯巒巒秀竦立崖端奇絕

著衣亭 或曰振衣在重雲左凡合山祝聖至亭具威儀故名

三關亭 在師子巖高峯和尚室中垂三問以勘學者曰大徹底人本脫生死因甚命根不斷佛祖

公案只是個道理因甚有明與不明大修行人當遵佛行因甚不守毘尼揭示於亭罕有契其機者故目之曰三關

華橋亭 在蟠龍橋上枕雙清之水口

倚翠亭 在翠微巖下

仰止亭 在寺後乃登山發軔處谷近滄題

如斯亭 在半山橋即半山亭嘉慶六年重建

眠牛亭 在觀音巖上旁有臥石如牛

獨樂亭 在寺後獨樂園脩篁茂樹可玩

望江亭 歡喜亭 天華亭 俱在蓮華峯左右

格思亭 在龍池之上

蟠龍橋 在寺前今為兩華橋

龍源橋 在南庵之東對周王廟

登天橋 北今廢

伏龍橋 在寺左通紫霞庵今呼為接龍橋

踏翠橋 倚翠亭下東陽水循此入大澗

清涼橋 在真際亭東



接引橋 在著衣亭西

步雲橋 在重雲壩後

死關 在千丈巖端高峯和尚居張公洞揭

東關 在東天目之西下通泥嶺董嶺以達孝豐

西關 在安吉孝豐英宗時禦山寇築

豪遷關 在天目山西隅左通孝豐宣城

千秋關 在天目西麓高三百丈接寧國界

尊宿

佛標鷲嶺以高居祖聽瀉山而歷選緣須契地教不違時至如獅子座之懸記西來於是梅檀林之同叅中止詩云維嶽降神生甫及

晉

申此之謂也志尊宿

竺法曠法師 姓臯下邳人寓居於潛天目山南蚤失

隴畔以供色養及母亡服闋出家貧無蓄嘗躬耕為師迄受具戒棲風立操卓爾殊羣履素安業志行淵深印嘗疾病甚危師乃七日七夜所誠禮懺忽有五色光明照印處印如覺有人以手振之其病遂愈後辭遠游廣尋經教還止於潛青山石室每以法華為會三之旨無量壽為淨土之因常吟咏二部有衆則講獨處則誦謝安為吳興守特來展敬而山棲幽阻車不能通於是解駕山椒凌峯步往簡文帝遣堂邑太守曲安遠詔問起居井諮以妖星請師為力師答當勤德政以弭之仍與弟子齋懺有頃災滅興寧中東游禹穴郝超謝慶緒並交結塵外時多疫疾師善密咒遂繞行村里疾者皆效孝武帝欽承德風要請至京事以師禮止於長干寺元興元年卒春秋七十有六散騎常



侍顧愷之為師作讚傳云

齊

法匱法師

潛之天目山人姓阮氏少出家為法楷弟  
子賦性恭默少語言樸然自守不涉世事  
日誦法華經一部時猶沙彌便靈跡殊異後一日  
三處皆見師來中食晚歸臥房奄然而卒實永明  
七年也尸甚香輒手屈二指眾乃悟其得果武帝  
臨幸為會僧設供文惠文宣並詣敬禮為營殮葬  
瞻施稠疊遂起浮圖於積園寺

梁

慧集法師

天目山人年十八於樂林山隨慧基法師  
受業本性慤實言無華綺學勤昏曉未嘗  
懈怠遍謁名宿融治三藏方等並能綜達廣訪大  
毘婆沙及雜心健度以相讐校故於毘曇一部擅  
步當時凡碩難堅疑悉為披釋海內學賓無不磨  
至僧旻法雲名高一代嘗請益焉武帝每延開講

以天監四年還天目至烏程遭疾而卒春秋六十著毘曇大義疏十萬餘言盛行於世

唐

慧琳法師

字抱玉俗姓柯新安人卅齡受業於靈隱  
大歷初受具於靈山會習學三乘一領無遺不樂  
聲華唯好泉石一入天目二十餘年此山高出雲  
表頂多蛟龍池三所最上池人不可近臭氣逆人  
或說山神作白鹿形每五月與震澤龍會必暴風  
雨焉師居之每多妖異而心不撓元和丁亥太守  
杜陟請於永福寺登壇至己丑春刺史裴棠棣召  
臨天竺寺壇度人畢復還天目講訓僧徒向二十  
載白居易等九邦伯皆以公退至院稽問佛法宗  
意染指性相此諸名公簪組儒辭學深遠或號  
毘曇孔子或名勝力菩薩非師何以感動哉太和  
六年四月二十五日葬於錢唐永安寺西山之陽四  
其年五月十五日葬於錢唐永安寺西山之陽四  
塔巋然尚存



慧忠禪師

姓冉氏越州諸暨人莫辨甲子或謂期頤

雙峯心承一印為曹溪嫡嗣行無住相歷試名山

至西天目或松下安居於九旬或嵌空息慮於三

昧既戀明月之戒亦淨琉璃之心已度禪定之門

不起無生之見疑若蘇盧八風莫能動淨如慧鑑

萬象何所隱薄游吳楚至於順陽卜黨子谷以居

開元中刺史前開國公王琚司馬卿趙頤貞信潭

以清聞風而悅稅駕扣寂接足交驩上奏元宗徵

居香刹王公大臣罔不膜拜從而問道後肅宗欽

其德風敕內給事孫朝進馳手書驛騎迎師遂高

步入宮天子崇奉待以師禮奏理人治國之要暢

唐堯虞舜之風帝聞竦然膝之前席宣旨敕住干

福寺尋移光宅寺後十年十二月九日示寂諡大

證禪師仍建塔於黨子谷

鑒宗禪師湖州人姓錢即禮部侍郎徽之孫父晟有

病間孝譽聞於親里風骨不凡挺然有拔俗之志

時州開元寺有上都臨壇大德內供奉高閑閑善

草隸嘗對懿宗御前揮毫甚高華望師誓禮為師

年二十七具戒閑使出學涉通淨名思益經遂常

講習閑亦示其筆法漸得鳳毛焉倏棄之往謁鹽

官悟空大師隨眾參請頓徹心源却歸故鄉勸人

營福咸通三年辛巳遂止天目東登徑山道俗皈

敬恢揚法教弟子之尤者洪察洪諱洪詣洪寂知

名咸啟咸謙行滿行真皆分枝化物師至七年丙

戌閏三月五日示滅世壽七十有四坐四十八夏

後乾化五年吳越武肅王請於朝追諡

無上大師吳興沈敬脩述德贊記焉

洪諱禪師姓吳烏程人年十九禮無上大師落飾精

寺受滿足律儀俾誦大比丘部匝七日念竟遂習

毘尼尋傳經講自謂為僧有軼羣事業而歸觀本

師師曰汝於十二時中將何報答四恩三有師聞

斯詰憮然失措三日忘食本師招誘多方始得悟

旨於是往謁雲巖瀉山石霜各為切磋蔚成匠手

俄而會昌中例遭沙汰眾皆悲泣惋歎獨師宴如

也時於長沙羅晏召居家供施蓋師執白衣比丘

法初無差失涉彼二載若門賓焉大中初復僧服



乃還天目觀師明年無上大師遷化眾請嗣其位  
 始惟百僧後盈千數中和三年賜紫衣景復二年  
 賜號法濟大師於光化四年九月廿八日辭眾而  
 逝初武肅王居石鑑山及就戍應募為軍師見執  
 手屏左右而謂曰好自愛他日貴極當以佛法為  
 主後王累立戰功為杭州牧奏置師號見必拜跪  
 檀施豐厚終執喪禮  
 蓋念微時之知遇也

宋

天目齊禪師

嗣五祖演禪師見禪燈世譜  
 係南岳下十五世行實無考

彥充禪師

於潛人姓盛氏幼依天目明空院義堪為  
 師得度游學首叅大愚宏智正堂大圓諸

老後聞東林訶庵謂眾曰我此間別無元妙祇有  
 木札羹鐵釘飯任汝齧嚼師竊喜之直造謁陳所  
 見解林曰據汝見處正坐在鑒覺中師疑不已將  
 前所得一時颺下一日聞僧舉南泉道時人見此  
 一鉢花如夢相似默有所覺曰打草祇要蛇驚次  
 日入室林間那裏是巖頭密啟其意處師曰今日

捉敗這老賊林曰達磨大師性命在汝手裏師擬  
 進語驀被攔臂一拳忽然大悟得汗流浹背點首  
 自謂曰臨濟道黃蘗佛法無多豈虛語耶遂呈頌

無門開禪師

名慧開杭州人萬壽崇觀禪師法嗣也  
 初駐錫天目蓮華峯下旁有獨角龍王

池及出世嘗說法龍興之黃龍山後棲定保寧寺  
 偶卓錫西湖北山有石矸不合成如礪忽雷震劃  
 然出泉甘冽澄若重淵遂以黃龍洞呼之豈龍隨  
 錫至耶理宗寶慶四年不雨咸詣洞禱輒應甘霖  
 涓祐七年復大旱少保孟珙丞相吳潛鄭清之奏  
 師鴻需屢驗召入文德殿設法座演說真乘師形  
 矧劣指日觀眾而後踰闕施重密伺其所為師默  
 朝士多竊笑之雨既徧洽理宗密伺其所為師默  
 然而已問何致是答曰寂然不動感而遂通理宗  
 悅賜號佛眼禪師救建護國仁王寺師膺殊錫誓  
 宏法教唯自諱報身不偉於洞之巔鑿峯肖己形  
 長丈許每私祝云願後有身等此師遷化之夕錢  
 唐孫氏婦李氏夢一僧篝燈自稱開道者寄宿翌  
 日產男法相非常實宋景定四年歲癸亥十一月



二日也遠長身長九尺有奇出家稱法王子是為中峯大師中峯居天目活處庵亦奉有石像形不滿五尺云自火宅所遷即無門本相也師嘗作補衲看經二偈傳世其嗣無見和尚字瞎驢亦做無門之義高峯語石屋云温有瞎驢是也

曇印禪師

隸天目明空院以說法被遇理宗御書松巖方丈四字以賜仍製頂相贊而褒崇之

嘉熙間建閣安奉

天目肇禪師

嗣育王裕禪師見世譜南嶽下十七世行實無考

元

高峯禪師

名原妙吳江徐氏母周夢僧乘舟投宿而孕生于嘉熙戊戌三月二十三日申時纔離襁褓即喜跌坐凡遇僧輒愛戀欲從之游十五歲請父母出家投烏戌密印寺法性為師十六薙髮十七受具十八習天台教二十更衣入淨慈立三年死限學禪一日父兄尋訪巍然不顧二十二

請益斷橋倫令叅生從何來死從何去話於是脇不至席飲食俱忘或如廁惟中單衣而出或發函忘肩鑷而去時同叅僧顯慨然曰吾已事弗克辦曷若輔之有成朝夕護持惟謹時雪巖欽寓北碕塔乃懷香往叩之令看無字欽忽問阿誰與你拖個死屍來聲未絕即打如是者不知其幾值欽赴處州南明師即上雙徑叅堂半月偶夢中忽憶斷橋室中所舉萬法歸一歸何處話疑情頓發三晝夜目不交睫一日少林忌隨眾三塔諷經次擡眸忽睹五祖真贊云百年三萬六千朝反覆元來是這漢驀然打破拖死屍之疑其年二十四矣解夏詣南明欽問萬法歸一語師云狗舐熱油縮自是機鋒不讓次年江心度夏由國清過雪竇見西江謀希叟曇洎欽掛牌於道場開法於天寧師隨侍服勞屢將有委任辭色毅然終不可強丙寅冬遂奮志入臨安龍鬚誓曰拚一生做箇癡漢決要這一著子明白越五載因同宿道友推枕墮地作聲廓然大徹在籠鬚九年縛柴為龕風吹日炙冬夏一衲不扇不爐日擣松和麩延息而已甲戌遷武康雙髻峯學徒雲集然庵小難容乃拔其尤



者居之丙子春眾僧避兵四去師獨掩扉危坐自  
若己卯春腰包宵遁直造天目西峯之巖意未幾  
巖拔地千仞崖石林立造巖端石洞營小室如舟從  
慕羶之蟻復集師乃死關上溜下淖風雨飄搖絕給  
以丈橫半之榜曰死關上溜下淖風雨飄搖絕給  
侍屏服用不澡身不薙髮截癸為鐙併日一食晏  
如也洞非梯莫登撤梯斷緣雖弟子罕得瞻視乃  
有三關語以驗學者自非具大根大志者鮮不望  
崖而退雪巖方住大仰凡三喚師堅臥不起遂以  
竹篔簹拂及綠水青山同一授記語囑之師懷中  
瓣香始於人天前拈出道風日甚至有他方異域  
越海踰山而來者矣鶴沙瞿提舉施巨莊瞻眾師  
曰多易必多難吾力弗克勝堅拒之公施心彌篤  
乃命僧議以此田歲八別建一刹得蓮華峯岡脈  
形勢俱勝請以大覺為額師患胃疾已數年然起  
居交際未嘗少廢乙未十二月月初一黎明辭眾偈  
曰來不入死關去不出死關鐵蛇鑽入海撞倒須  
彌山泊然而寂啟龕七日端坐如生越二十一日  
庚申塋全身於死關壽五十八夏四十三良渚全  
從進請師翦髮供禮得舍利纍纍如貫珠師貌清

古體脩偉常俛首而坐非問道不答聞說人過則  
首愈低東坡有云瑟瑟寒松露骨耿耿老虎垂頭  
殆為師傳神也

斷崖禪師

名了義吳興德清人姓湯父大宥母張氏  
生於宋景定癸亥十一月二十二日育能  
食不茹葷血六歲始言但從其母誦法華經於人  
世情情無所知姿貌巍然志若有所待年十七有  
禪者過之誦高峯上堂語曰欲窮千里目更上一  
層樓師忽言曰此大善知識必能為人拔釘去楔  
爾能與我往見之乎母驚異之畧具衣裝與之行  
見高峯於天目山獅子巖之死關為童峯謂曰汝  
所持何多為師曰以待寒暑峯曰學佛者不如是  
師即盡散與諸人乃合提萬法歸一歸何處話  
因名之曰從一他日峯為僧舉牛過牕櫺話師聞  
之忽生疑叅究不倦一日告峯曰上極天宮下窮  
水際盡大地一琉璃瓶峯曰莫作聖解他日過鉢  
孟塘見松上雪墜有省即詣峯呈頌聲未絕即痛  
棒之不覺殞身巖下懸崖壁立人其必死同學  
通明捫蘿接磴以救之則師出半山了無所苦謂



通曰我往江西見欽公去也通曰汝孤負老漢棒  
矣力挽之還即與通還山之西禪庵自誓曰七日  
不證決去矣遂端直堅壁忘廢寢食夜則攀樹露  
立達旦未至所期豁然大悟馳至死關呼曰老和  
尚今日謾我不得也輒呈頌峯一蟹即上堂云我布  
天網打鳳羅龍不向孤峯絕頂揚聲大叫且道  
蟲撞入三十年後大地山河一片雪師便奪峯拂  
子為衆舉揚師原勵同學辭之峯歎其峻快有僧  
一發真歸見師從一皆知之峯歎其復曰盡大地  
峯次峯令見師曰如縣絲之慮遂歸德清其母  
叅者愧之未幾有命如縣絲之慮遂歸德清其母  
俗罔測其意越五年還山峯曰大有與人居人見  
帶水師曰兩眼對兩眼遂落峯改其名曰了義  
元貞乙未峯示寂師亦翰晦或游禪林頽然居下  
板孤峭嚴峻不假人辭色或觸其機鋒發言如奔  
雷諸方宿衲莫不驚人辭色或觸其機鋒發言如奔  
迎奉無虛日霜雪所至四眾歸重公侯貴人爭相  
迎奉無虛日霜雪所至四眾歸重公侯貴人爭相

未嘗受請立僧而威尊之日義首座云中峯本公  
大揚高峯之道烜赫昭著法席之盛中外罕及至  
治癸丑棄眾而化同門布衲雍公見地明白提唱  
超卓去世更謂早後泰定三年師勉從眾請歸坐  
庭者一載除却語默動靜道將一句來又嘗曰一  
息不來向何處安身立命然或嬉笑怒罵猶言穢  
語人所不堪或不因勸請自肆譚說或成偈頌不  
待思惟應機而發人所莫測元統元年歲除日師  
忽謂從者曰有一件事天來大你們還委悉麼良  
久云更好日年朝正月六日乙未詣法雲塔西指空  
地曰更好日年朝正月六日乙未詣法雲塔西指空  
乃曰老僧明日往無縫塔其晚與禪眾談笑至夜分  
壽七十二僧臘四十九建我不及翌日跏趺而化世  
塔于開山殿之西日雲深  
**中峯禪師** 名明本 杭之錢唐人 俗姓孫 母李氏 夢無  
挺異 具大人相 纔離襁褓 便跏趺坐 能言喜歌 贊  
梵唄 凡嬉戲 必為佛事 九歲 亡母 讀論語 孟子 未

西天目山志 卷二 尊宿 古



終卷已輟學年十五決志出家禮佛然臂誓持五  
戒日誦法華圓覺金剛諸經夜則常行因以首觸  
柱自警居近靈洞山時登山巔習禪定甫冠閱傳  
燈錄至菴摩羅女問曼殊明己而生沙門明者指  
何却被天目高峯和尚孤峻嚴冷不假辭色一  
師往叅欲為祝髮以父命未許峯曰可舉閣夜  
見驩然出家因緣喻汝父勿自沉溺未幾誦金剛  
多尊者如來處恍然依通非悟也時年二十有  
經至荷擔師自謂識量依通非悟也時年二十有  
四實至元丙戌歲明年觀流泉有省即詣峯求證  
明年受具戒又明年觀流泉有省即詣峯求證  
打趁出既而民間訛傳官童何峯女師因問曰  
有人來問師和尚下洞然徹法源且相不思議佛  
窳子與他師言真贊付師曰我相不思議佛祖莫  
能視獨許不肖兒得半邊鼻且相不思議佛祖莫  
益眾由此知歸淮僧子證嘗問高峯眾弟子優劣  
峯曰若初院主等一知半解不道全無如義首座  
固是根老竹其如七曲八曲唯本維那却是竿上

林新篁他日成材未易量也壬辰松江瞿公霆發  
施田二百七十頃於蓮華峯建大覺正等禪寺元  
貞乙未冬十一月高峯將遷化以覺屬師師辭  
推第一座祖雍主之德丁酉師登皖山游匡廬  
至金陵戊戌結庵廬州弁山學者輻湊師雖拒之  
而來者益眾庚子結庵廬州弁山學者輻湊師雖拒之  
席癸卯瞿公堅請師還學叩師心要師力辭避之時  
趙公孟頫提舉江浙儒學叩師心要師力辭避之時  
復性之旨公後入翰林復遣問金剛般若大義師  
答以畧義一卷每見師所為文輒手書又畫師  
像以遺同叅者乙巳師還廬高峯塔丙午領師  
子院至大戊申仁宗在東宮賜號法慧禪師已而  
乞食勾吳因謝院事己酉道儀真即船以居庚戌  
眾請還山兵部鄭公雲翼時僉浙西廉訪司事候  
師餘杭問法師推明經世之學以答之詞見  
廣錄辛亥師復船居吳江陳子聰建順心庵請師  
開山既而渡江擬游少林至汭隱其名傲城隅土  
屋以居僧俗爭相瞻禮皆額首曰江南古佛也皇  
慶壬子結茆廬州六安山江浙運使相奉書訪問  
師去之東海州癸丑瞿公以兩浙運使終師還弔



其喪公之子時學奉宣政院疏復請師住大覺師  
舉首座永泰代已泰欲承嗣師師之風莫不敬  
山萬公蓋以院第懇請其來久矣聞師固辭中書平  
仰丞相延師私道德孚於人者博矣宜順時緣住  
章又請日恢張佛祖建立之心無多讓也師曰夫住  
一利以具三種力庶不敗事而闕其用尚為三智  
持者須緣智儀不備耳使道體既虧便神異無  
力道體也緣智儀不備耳使道體既虧便神異無  
但化權不周事儀不備耳使道體既虧便神異無  
算雖緣與智亦奚為哉體用其實故不敢尸其名  
因曰果寧無歎於中乎某無其未疾還山中延祐  
丙辰春上命宣政院使整師辭以未疾還山中延祐  
謁師聞避之鎮江丁巳丹陽蔣均建大同庵入山候  
居之戊午衆請還山九月上顧謂近臣曰朕聞天  
有疾山中峯和尚道宜袞寵旌異之召賜號佛慈圓照  
廣慧禪師并戒道宜袞袞旌異之召賜號佛慈圓照  
俾安心禪寂改師禪院為師州路優禮外護  
林學士承旨趙孟頫撰碑以賜特贈高峯和尚佛

日普明廣濟禪師先是駙馬太尉潘王瑋遣叅  
軍洪鑰賈書幣敘弟子禮期草廬咨訣心要師  
未秋九月王奉御香入山謁師萬餘言王復求法名  
別號師名以勝光號曰真際王因建亭獅子巖畔  
以記其事至治王成行宣政院虛徑山將終焉山北  
距西峯三十里重溪復澗穿崖險捫蘿薛昌山  
虎緇白隨禮無虛日師愍其跋涉尋歸草廬十月  
英宗特旨降香并錦襪僧伽黎詔行宣政院官親  
詣山中宣諭恩意時江浙省右平章今丞相答刺  
罕脫歡公命理問官阿敦偕院官行乞師法語中  
書叅知政事敬公儼亦嘗通書問法其為天子大  
臣所知遇蓋如此師每斥學春者一日尚言通不  
悟時刻提擲激勵後學癸亥春一日汝種蔬欲為  
始未曰汝負春欲為誰煎耶汝負春欲為誰煎耶  
誰薺耶汝負春欲為誰煎耶汝負春欲為誰煎耶  
六月十五日折簡大用座日幻庵向秋決作離  
散計繼書屬門人幻者朝死一夕化佛事不許徇世  
若停龕祭奠諷經入祠做忌一切佛事不許徇世



俗之禮復條示師子寺惟以放下節儉克究初心  
慎守開山明訓合法久住之意越十日師示疾有  
來省者師曰幻住庵上漏旁穿籬垣壁倒不可久  
住也語笑如平時學強師服藥謝之曰青天  
白日曲徇人情耶揮去僧有告歸吳門者師曰何  
不過了八月十五去至十三日蚤復手書遺辭曰  
寫偈遺別法屬故舊問如何蚤復寫偈置筆安坐  
有一偈遺別法屬故舊問如何蚤復寫偈置筆安坐  
而逝停龕三日身體溫軟顏色不變有禪者乞身  
瓜髮誤傷指端血出如生時道俗數千人奉全身  
塔於開山殿之西望江石先是其年春涸凍山中  
大木皆摧折若世所謂木稼識者異之至破之日  
白虹貫於山巔師生宋景定四年癸亥十一月二  
日世壽六十有一僧臘三十有七初侍高峯於死  
關日作夜坐脇不露席勵精勤苦諮決無怠踰十  
年方承記荊退而晦藏以住山交聘避走南北所  
過輒成寶坊海內學者望風慕識與不識皆自  
之曰大和尚家繪像而敬事之其道莫之能致也  
天子萬里延慕每欲召至闕庭而卒莫之能致也  
王公大人北面事師而嚮道者傾動一世下逮屠

沽負販優伶工伎厮與暴悍之流師一真慈相隨  
宜說法未嘗以高下貴賤而尊易諂瀆之也得師  
半偈不容重寶或藏所薙髮輒成舍利有疑謗者  
一接言容無不遷善為師外護遠至西域北庭東  
夷南詔接踵而來南詔沙門素閑教觀東來問法  
實自元鑑始嘗於師言下有省繼而普福寺等  
比丘畫師像南歸至中慶城四象迎像入城異光  
從像燭天萬目仰觀翹勤傾信絲是興立禪宗奉  
師為南詔第一祖師之法量汪洋無辯才無礙至於  
悲願誘掖諄諄誨諭戶履日滿一飲醇許可凜凜然  
之門者如泛重溟不測涯涘如飲醇許可凜凜然  
及其勘辨學徒決擇心法不假借慎許可凜凜然  
如秋霜冽日嚴不少貸其為文信筆萬言了不經  
意而其辭必歸於警昏懵明宗旨闢義解顯正悟  
極於第一義諦而後已若夫立身行道每視前言  
往行或有缺漏輒為歎息而師之行則不蹈其  
失墜也故師之立言示訓非其素履而躬踐者則  
終其身不言也至於退恬逃名根於天性清苦自  
持尤矜細行大覺師子緜師克成及奉敷撰碑師  
不惟不肯涉分寸功并其名字亦不肯與於其間



也隨所寓草創庵廬皆曰幻住又因以自號焉嘗  
 隆暑病渴膚腠汗腐有遺細葛褻衣者受之終不  
 衣也。因體肥稍俯首則氣喘常平目安坐凡請求  
 法語以兩入扛紙信筆仰書之游淮汜井汲艱遠  
 遂終身不復頽浴聞說人過失則閉目不答。凡傳  
 記語涉攻訐毀譽則掩卷不觀。僧有臥疾則濟以  
 湯藥而策其進道。有省親者則施以財法。勉其孝  
 養。撰集諸書三十卷。總名廣錄。並傳於世。師自敘  
 畧云。余初出家。志在草衣。垢面習頭陀。行以文  
 服。田衣。抱愧沒齒。平昔懶退。非矯世絕俗。蓋以文  
 字則失於學問。參究則闕於悟明。尋常為好事者  
 之所稱。蓋報緣之偶然。耳。於戲。師乘大悲願力。為  
 法檀度。觀時適宜。隨機應物。如摩尼珠。無有定色  
 為未證。謂證得者。說我無悟。昆尼法為滯。前塵而  
 韜晦巖谷。為毀犯律儀者。演昆尼法為滯。前塵而  
 溺多聞者。闢見海導。以正悟為圓。機者直示向  
 上師。莫不以身先之。而不事夫空言也。然一心平  
 等。泯絕去來。不畱朕迹。槩非常情所得。而窺測也。  
 布衲禪師。春爨樵。標貌瘠。黑慙而少文。每循乞。給眾

松江瞿運使。建蓮華峯大覺禪寺。大德癸卯。延師  
 住持。師見地明白。提唱超卓。嘗和永明山居詩。其  
 意趣不相上下。而句法圓融。間有過之者。後住中  
 天竺桂子堂。書偈安坐而逝。火餘舍利。頗多。齒與  
 念珠二俱不壞。

空中禪師。名以假得。法高峯和尚。左右久之。後棲禪  
 元丙子夏。一日。援筆書偈曰。地水火風。先佛記掘  
 地深埋第一義。一免檀那。幾片柴二免人言。無舍  
 利。加跌儼然而化。

定叟禪師。名永泰。西江人。初歷職。開先一山萬公會  
 住舉師。居蓮華峯大覺寺。及出世。欲改嗣。  
 幻住。幻住。峻却之。令嗣一山。居三年而寂。

慈寂禪師。梵名善達。密約里高昌人。其宗姻鄉黨之  
 教。好施與。又好引援。升進。以相榮而師。一無所取。  
 焉。唯道是嗜。凡密顯二宗。悉從事之。盡其學。未厭。



其志延祐間南來天目扣直指之學於幻住日有  
深造遂眷眷不忍去草衣蒲履冰蘂相持者有年  
遠幻住告寂始北歸諸達官嚮其道爭羅致之然  
猶兢兢潔己非誠心求道者不與語非其人  
交與交必盡其義嘗以幻住廣錄三十卷進上覽  
之大悅賜入藏諡幻住為普應國師既間關往復  
成其事復入天目願守國師之塔以老焉及有疾  
同居者強其出山就藥遂終於吳門之能仁庵時  
至元丁丑三月二十一日也

易首座

字無象夏氏子膂力過人武備最精嘗襲父  
爵不樂棄官至上虞寺落髮其師俾誦心經  
三日不記一字因惡之時有僧善妙峯過謂其師  
曰此子既不識字好危坐恐是禪定中來可與我  
否其師欣然許之去屹如枯株隣單正首座者嘗  
不至席忽一日徐徐出定似有慶快清夜坐廊間正  
候之經七日徐徐出定似有慶快清夜坐廊間正  
云且喜大事了畢師不答指所見鐘樓說偈黎明  
即振錫兼程抵華頃謁溪西和尚值曉黑宿門外  
味爽門啟入見往復勘對有悟踢倒香椅既行谿

喚回不應竟下山往天目謁高峯和尚機語尤契  
合俾為首座至正初去明之海會端居一室刻絕  
諸緣影不出戶道具不離側人咸敬之甲午正月  
沐浴更衣至佛前三禮退跌坐告眾曰吾前日不  
向汝道乎乃泊然而終壽九十九停龕七日顏貌  
鮮潔手足輒暖闍維見火光迸散如  
躍眾九絕無煙靄獲舍利不計其數

印原禪師

字古先世居相州姓藤氏為日本國中貴  
持以印空父奇之曰是兒與菩提有緣宜使之離  
俗學究竟法甫八歲歸桃溪悟公執童子之役年  
十三即薙髮受具足戒自時厥後徧歷諸師戶庭  
咸無所證入懺然嘆曰中夏乃佛法淵藪盍往求  
之於是入憚鯨波之險奮然南游初叅無見覩公  
於天台華頂公語曰汝之緣不在於斯中峯本公  
以高峯上足現說法杭之天目山爐鞴正赤遠近  
學徒無不受其煅煉此真汝導師也汝宜亟行師  
即蓬累而出往見中峯峯見遽命給侍左右師屢  
呈見解幻住呵之曰根塵不斷如纏縛何師退涕



淚交流飲食皆廢幻住憐其誠切乃謂之曰此心  
包羅萬象迷則生死悟則涅槃生入眼金塵當知  
易驅斥滄槃之悟猶是入眼金塵當知一念生與  
火聚近之則焦首爛額惟存不脫使未悟之際千  
迦萬慈氏傾出自然與道相符合耳根總是虛妄  
勞皆非究竟捨積之師久聞不覺通身汗下無晝  
夜未嘗暫捨積之師久聞不覺通身汗下無晝無  
一白無際忽趣丈室告曰原已撞入銀山鐵壁去  
也幻住曰既入圓融纖毫無滯師辭去幻住囑之  
十二時中觸物圓融虛谷靈公古林茂公東嶼海  
日善自護持當是時虛谷靈公古林茂公東嶼海  
公月江印公各據高座展化一方師咸往謁焉諸  
大老見其證悟親切機鋒穎利以叢林師子兒稱  
之會清拙證公將入日本演化師送至四明證曰  
子能同歸以輔成我乎師曰雲水之踪無住無心  
何不可之力也師出攝衣升舟其後證之能化行遐邇  
皆師之力也師出攝衣升舟其後證之能化行遐邇  
中峯黑白來依猶萬水之赴壑七主名利而遷建  
長說法度人孜孜弗懈歲甲寅春正月示疾至二

十三日黎明賓朋候問起居應接如常及午呼侍  
者時至矣可持觚翰來及取至復曰吾塔已成唯  
未書額耳大書心印二字入室端坐  
泊然入滅世壽八十僧臘六十又八

一山魁禪師

蘇州人博學多才與天童平石翁交甚  
棲遲巖谷不與世接有大梅嬾瓚之風每與山下  
洪姓諸子弟往來既終洪氏夢師乘一山轎至其  
家次日產一子名應魁字士元自幼入學至娶妻  
育子絕無前生趣味年三十忽自猛省盡變平日  
所為與一僧明維那者結屋天目絕頂習禪定至  
若燒畚乞食皆躬為之雖老於頭陀者有所不如  
至正丁酉猫獠燒劫徑山時恕中溫公奔抵其所  
士元肅容禮度和雅對答從容徐問其故乃知魁  
後身也因謂之曰公前生與平石翁為莫逆交今  
翁年九十耳目聰明公蓋作偈寄之庶見一夢兩  
覺而夢覺一如乎士元乃偈曰寄語天童老平石  
一念非今亦非昔欲聽楓橋半夜鐘吳江依舊連  
天碧偈未到天童  
平石翁已入寂矣



千巖禪師名元長字無明越之蕭山董氏族世業儒  
鞠以為子七歲就外傳諸書經目輒成誦師之諸  
父曇芳學佛於富陽法門院欲乞師為嗣謝不允  
未幾師遭疾甚革謝禱於觀音大士曰佛幸我慈  
俾此兒弗死合服灑掃終身禱已師汗下而愈遂  
使從芳游師年始十七益求良師友磨切九流百  
氏之言已而曰非出世之法也復從授經師學法  
華經至藥王品問曰藥王既然二臂曷為復現本  
身耶授經師異之曰藥王九法往來片無垂角何謂  
律於靈芝寺律師問曰八法往來片無垂角何謂  
也師曰何不問第九法乎律師曰問律而答以禪  
真大乘法器也會行丞相府飯僧師隨眾入時中  
峯和尚亦在座遙見師即呼謂曰日用如何師曰  
惟念佛爾峯曰佛法要在師方擬對峯厲聲叱之  
師遂胡跪懇求法要峯以狗子無佛性話授之繼  
往縛茅靈隱山中雪庭傳公召師掌記室師下筆  
成章五彩交燦見者歎服俄棄歸法門隨順世緣  
殆將十載一旦忽喟然嘆曰平生氣志充塞乾坤  
今乃作甕裏醯雞矣復造靈隱危坐脇不沾席者

三年因往望亭聞雀聲有省急往天目見中峯具  
陳悟因中峯復斥之師憤然來歸夜將寂忽鼠翻  
蟬蛻汗濁之中浮遊元問上天地下地一時清朗披  
衣待旦復往質於中峯問曰趙州何故云無師  
曰鼠餐猫飯峯曰未也師曰飯器破矣峯曰破後  
云何師曰築穴時壁峯乃微笑祝師曰汝宜善自  
護持棲遯巖穴時節若至其理自彰師曰汝宜善自  
乃為時所容與弟子希聲杖錫踰濤江而東至烏  
傷之伏龍山乃卓錫巖際遂依大樹以居實泰定  
丁卯冬十月也邑大姓樓氏為構伽藍海內外咨  
決心學畱者恒數百人朝至三遣重臣降香書額  
加號并金襴法衣以賜焉至正丁酉夏六月十四  
日索浴書傷投筆而逝春擬寒山詩傳流於世語  
錄并和智覺永明壽禪師擬寒山詩傳流於世語  
元鑑禪師南詔人素明教觀辯博英發每曰吾聞大  
當吾將易其宗旨而趣教觀由吾將從其學或未  
謁普應國師一聞師語便悟昔非未幾言下有省



洞法源底依戀八年方圖歸以倡道而歿於中吳  
鑑徒普福等畫國師像南還有光像燭天之異興  
立禪宗奉普應國師為南詔第一祖

**海會翁禪師** 臨安人年三十捨家入釋投徑山虎巖  
止山野竊譏謂之師發憤翌日即往天目求中峯  
和尚誨示於是忘餐廢寢殫力參究夜深睡重難  
遣摘數珠撒暗地摸足數乃已久之間游東州古  
林東嶼之門漸臻智證出世龍華年九十三抵育  
王守橫川祖塔俄平地跌損左足不能動履每牀  
坐當清夜朗吟古偈語其徒文煥曰一生參禪  
到此不能受用却託吟咏自遣師曰不見大慧和  
尚因疾呻吟左右云平生呵佛罵祖今乃爾大慧  
云癡子呻吟便不是耶煥即

**鹿巖禪師** 名明初禮高峯和尚薙髮嘗監院事峯嘗  
享年不永及逝幻住祭之云先師以無上道變為  
毒藥設為陷窵我師兄嘗中其毒親陷其險是故  
禮拜既坐化徧室異香襲人

三十年後浸漬既久因地發生毒處愈毒  
險處愈險使人望風所額毛骨為之凜然  
**逆流和尚** 嘗繼義公領師子院事幻住贈以偈曰出  
答其簡曰適六環飛下天目率山中龍象過余而  
不及會徒誦分明只在尋常處如隔千峯與萬峯  
之句

**正印禪師** 本蒙古人住持普慶禪寺歷徑山第一座  
閣虞學士嘗侍香斷崖和尚席後崖入寂師求奎章  
為之銘

**天如禪師** 名惟則廬陵人幼即知有叅學每以不遇  
峯多方折挫始信叅禪學道是錯用心從此一放  
放下後學掠虛之戒自追踪巖大木既拔羣棲舉  
隨所飄而東西不集師亦追踪巖大木既拔羣棲舉  
一個蒲團半間屋吳松江上九峯間之句居浙者  
十八九年託鶴灘者又十有二稔當母年七十八



時望師歸省迨至武林適漳寇敗因路梗塞度夏  
 雙徑辛巳十月抵吳門借幻室一榻為度寒計偶  
 東河有地數畝古樹叢篁如山幽僻可愛遂以  
 施力得之就樹下作小屋數間二時粥飯仰給於  
 日與同志之士收拾天目山蘿蔔頭莧菜根東齋  
 西嚼聊以自娛名所居曰師子林蓋不忘天目叅  
 悟處也時普度實立副使脫鐵睦爾副使買奴海  
 牙同知茫哥刺宣差馮總管等率眾士大夫來師  
 子林營齋請師普說同時延師升座者踵相接焉  
 泰定改元歸自浙中而甲子再出甲申再歸省師  
 二十年來山中眷屬消亡殆盡亡何亦示寂有楞  
 嚴會解師子  
 林語錄行世

頑石填禪師

得法中峯國師見  
 世譜行蹟無考

志彰禪師

字晦室居天目西庵月建西資會會諸禪  
 念佛事徑山元叟中竺一溪師子林天如諸公各  
 贈言贊之師嘗募青銅萬斤冶而為巨鐘簾於寺

巖之後岡幻住為銘  
 子昂學士為手書

大拙禪師

名祖能日本國人也幻住大衣嘗付千巖  
 長公後三十年師從伏龍山請復歸天目

供養以  
 鎮名山

季道演禪師

丁時兵燹蕩寺為墟師就基下級有小  
 平麓小約規摹建刹而居其眾焉

明

班的達禪師

名薩曷抄室利此云具生吉祥生於天  
 竺之中印度迦維羅薩衛國姓利帝利氏  
 稍長出家於迦濕彌羅國蘇囉薩寺初習通五明  
 經律論辯析精詳自以言論非究竟法遂篤修禪  
 定不出山者十數年師嘗慕震旦有清涼山乃文  
 殊應現之所吾當瞻禮遂發足從信度河歷突厥  
 屈支高昌諸國東行數萬里越四寒暑而達甘肅  
 時至正中元主聞之遣人迎至居吉祥法雲寺  
 從化者翁集元主問之遣人迎至居吉祥法雲寺  
 而機語不契乃往清涼遂獲初志及明太祖統有



天下杖錫來朝高皇帝嘉其遠至召見於奉天門  
 奏對稱旨即授以善世禪師之號特賜銀章俾總  
 天下釋教命於鍾山依八功德水而庵居焉復論  
 禮部有願從受戒法者勿禁車駕每幸鍾山必過  
 師室言論移時而賜詩什勞問甚至丙辰秋奉命  
 遊寶陀羅伽山既而登天目獅子巖禮三祖塔乃  
 棲遲久之於是龍象復歸於兵火之餘金碧重巖  
 於雲林之舊及還都謁太祖於華蓋殿天語溫接  
 寵賚彌厚於是從受戒法者八萬餘眾一日謂其  
 徒曰五臺清涼實吾初志今因緣已畢無復往矣  
 汝等將此梵書一帙泊吾遺骸少許至彼以足吾  
 願辛酉夏五月二十四日示寂事聞賜祭閣維獲  
 五色舍利無算烟燄所及凝綴松柏咸若貫珠收  
 斂設利而塔藏之時於咸陽師現神變彼處人民  
 禮供甚誼有使西回上詢邊陲因言  
 而知其事嘆曰善世其猶隻履歟  
**松隱禪師** 名德然字善世其猶隻履歟  
 唱豁然有所悟入舉目之頃日月星辰風霆雨露  
 飛潛動蟄皆演如來大乘妙法于是聲光聳起鼓

林間元季寺燬洪武九年師一新規  
 製二十四年鬱為叢林推主席焉

**空谷禪師** 名景隆字祖庭姑蘇洞庭龍山陳氏子為  
 山白蓮懶雲和尚受學參禪雖家居而湖海禪伯  
 如古拙輩靡不參謁庚子出家虎丘宣德二年詣  
 杭州昭慶受戒遂依師住靈隱七年往天目禮祖  
 塔憩錫一載刻苦參究忽有省因造懶雲剖露雲  
 印可之懶雲臨濟下二十四世也師所著有空谷  
 集三十卷心宗洞達機辯峻拔儒釋通貫事理交  
 融大理卿吳公誌之師年五十二時自  
 作塔銘於武林西湖修吉山之正傳院

**大川順禪師** 嗣松隱然  
 行錄無考

**顯宗禪師** 惠澄禪師 宣德乙卯相繼住持協心同  
 力於舊寺大基建覺皇殿極

為壯麗并置山下雙清莊計田地及山並三頃  
 有奇昔寺葉中衰而莊祚鼎盛皆二師力也  
**毒峯禪師** 名本善別號冰谷俗吳氏祖貫鳳陽以曾  
 祖武功累官拜南陽明威將軍降廣東雷



陽千戶師生於雷陽幼有至性即好佛事惡腥膻  
不茹葷菜僅從里師四閱月已輟學不諳文字年十  
七出家事源明和尚開示無字公案首學上叅遠  
能信解復聞無際禪師示警所契益深正統甲子  
無際應詔赴京師侍行途次工夫純熟坐即大定  
尋入富陽山清溪寺掩關尅期取證定至中夜廓  
然如霹靂聲四大分散已即覺返照寂光內外瑩  
徹如在入一絲頭上安身立命孤迥迥卓巍巍鼻息  
全無出入忽聞鐘聲說偈曰沉沉寂寂絕粉碎夢初  
着無端似雷動地一聲消息盡羶體粉碎夢初  
回自此內外典籍皆達其義趣然猶不自肯必求  
徹法源底而後已因禮月溪和尚契元旨受心印  
思古德云但有纖疑不到無學安能七縱八橫天  
回地轉遂歸天目萬峯庵掩關淘汰正統丁卯中  
貴來公請住北山玉泉景泰庚午復回萬峯掩關  
甲戌月溪和尚取師至金陵室中徧舉險絕祖關  
徵詰可啻善自保養次蘇州迨楚山和尚機契回  
杭壬寅赴天真之請據師行錄四十年間住持名  
刹十有餘處唯掩關樂清貧甘淡泊十年間住持名  
游觀時適宜隨機應物如摩尼珠無有定色知不

不知者皆稱善菩薩所著  
三要錄亦名大師子吼

月江禪師

名覺淨姑蘇人乃西天目高峯下七世孫  
初叅念佛公案謁錢唐古道山東明岳公  
一語契合留入弟子列既而長于祖堂習禪復還  
古道師問曰如何是祖師亦喝明擊禪版曰打  
得來師曰這裏來明在甚處師云打的也  
的在這裏不打的在這裏明曰這漢造佛殿竟但  
不打的也這裏不打的也明曰這漢造佛殿竟但  
果在師辭進天目居活埋庵三年太子庵六年鹹  
醉不沾枕席不御日惟一粥歲惟一衲空空灑灑  
遠屏世緣或游或息亦無定止後住茗溪水心院  
二十餘稔  
說偈坐脫

東明禪師

名洪僑俗姓胡氏係岢嵐州人家世武弁  
其大父夢神僧入闈而誕師及父都指揮  
使值成化辛丑胡虜寇邊力戰墜馬創甚告歸師  
方弱冠天性慈愍視父刃血為業不欲受職時該  
司將以蔭襲送部遂遁入京請度為香嚴寺僧禮  
大璋禪師祝髮焉既欲徧事叅訪復念我本畏業



逃逝今弗面親長往實貽厥憂急歸省其母母果  
 以失子勸喪明遂謝絕所聘令別適乞親以祖蔭  
 讓其弟以終行願母哀留弗克勉遺之金師曰觀此如  
 吾何用此哉母受之後行脚時浣拆得金縷於衣中  
 見母面善事自是南行徧詣諸名刹知識叅訣大  
 旨宏治間以受戒來杭及禮寶陀旋游天目遂結  
 草庵蓮華峯歷苦行六載嘗拾遺瓜皮菜葉療饑  
 以思惟至道不暇顧惜幻軀爰得禪定三昧後赴  
 請虎跑樹煉磨長期凡耆碩土彥觀師精行莫不  
 崇敬大成寶坊越三年受部檄為住持得宋寺相國廢  
 址遂成寶坊復蓋西方殿於寶叔多助告成皆  
 殿於天目後辰復蓋西方殿於寶叔多助告成皆  
 不逾年自後還山避絕世緣獨於殿左小閣設龕  
 方三尺許旦夕坐止勿寢六時課念華嚴諸經及  
 閱西方公據發願回向嘉靖甲辰孟冬泊然而化  
 萬松禪師名慧林姓沈氏仁和人生稟異質不類羣  
 父母察其志不可奪遂捨為法輪寺僧寺在省城  
 夙習瑜伽之教罔知出世法師獨愀然嘆曰此豈

生死大事可了耶素聞天目平野老人道行超卓  
 即投老人獲聞心要一日宴坐林間偶聞猿鳥音  
 廓然開悟仍別老人入京徘徊諸講肆研究元奧  
 夜宿通堂旁聞一僧誦丹霞上堂公案尤大了了  
 是時伏牛空幻之門已而入川峽登峨峯尋入徑  
 遂得法於空幻之門已而入川峽登峨峯尋入徑  
 山四方學侶日眾嘉靖丁巳忽謂眾曰吾報盡矣  
 絕穀月餘唯啜澗水示微疾而化目未瞑猶執筆  
 書云七十六年浮踪何倚本無去來應緣而  
 已於時禽鳥悲鳴瑞雪飛舞眾咸以為異云  
 天目秀禪師嗣雪峯瑞見世  
 一庵禪師名真忠仁和孫氏子年十七投天目出家  
 叅學禮誦雜華晝夜弗輟凡六載徧禮名山歸於  
 虎跑灌園凡三年即捨去飯僧於蕭山之新林天  
 台之會墅嶺虎林之崇福庵師平生衣垢徹體矧  
 陋朴古語不出諸口其髓腦供十方賢聖至則剖  
 半菽而茹之展半席而休之諸師未食弗敢食未  
 息弗敢息也溢而弗能居則已出而露處居亡何



仁風播於吳越施者如胥濤之殷江也陶司成石  
簣每過其門輒造之一日師出於圃陶亦就圃從  
容語佛法大意契敬而去後示寂  
建塔於富春仙山之福慶院焉

達觀禪師

沈師居常以究明大事肩荷大法恢復梵

刹方便利生殷殷在念專持毘舍浮佛偈大有省  
發機如掣電辯若懸河萬歷中循方禮塔上天目  
旦過大覺有一到蓮華如故國此身莫是老中峯  
句尋於獅子寺中雲庵駐錫焉念大藏經帙繁重  
不能遠及乃刻小方冊易為流通遂北游至石經  
山訪琬師遺跡得佛舍利適慈聖母聞師至命  
近侍賜紫伽黎延師供養是時公孤臺省無不折  
節下禮師道益隆聲益著乃欲續傳燈錄故逗留  
京師不意罹妖書之難竟成一夫負耳  
壽六十有一茶毘塔藏雙徑五峯之間

貝林禪師

名仁潮順天府人髫年出家及長杖錫游

好山水五臺峩眉衡廬諸山足跡無不到最後游  
瓦屋山山當窮處以鐵索懸梁空中以木版架其

上觸之則兩頭俱動師躡而過之經三四日無煙  
火間有之皆冷敗不堪師安之泊如也然以此致  
疾晚與趙凡夫朱白民王芥庵為方外友寄跡支  
硯年餘忽厭喧萬歷中潛之西天日外游性海結  
庵名華嚴師平生操行冰霜閱大藏能解大意亦  
能記持與之言患其多不患其少宗門元旨歷歷  
孤明第不相尚機鋒亦常自笑云吾其似五斗炊耶  
其留心惟以牧牛為事有古大思塵論而有契日  
徒徑山之別峯汲稍艱復徒寶珠峯結海雲庵居  
八年而終壽六十有八秀水朱銓部大啟為師建  
塔而瘞焉所著有法界安立圖說等七種悉根理  
要足為後學標幟云

無盡學禪師

北人也萬歷中寓杭城白馬廟與金侍

接待焉凡循方禮塔瓢笠如歸畜一驢俾運米自  
杭道烈復往還自識險夷去就無庸尾之者時謂希  
於西山云



國朝

玉林國師

名通秀常州江陰人俗姓楊父芳母繆氏

慧年十五見天琦禪師語錄知有參誰字法門疑

情大發因觸翻溺器有省年十九直造磬山依修

禪師薙髮受具為侍者一日于快日佛法落吾手

下瞥見馬祖機用不覺身心慶快曰歸省母即於江

矣自此每遇勘問當機不讓因辭歸省母即於江

上水墩靜室掩關一晚偶乘月泛舟舉首之頃

頓忘迷悟如虛空玲瓏不可湊泊急就證天隱於

報恩扣擊之次迎刃不留至掀案而出隱知其透

脫嘆曰此吾宗師子兒也隱示寂遺命令師主法

席師不從避之凌霄峯頂眾復堅請不得已起應

之丙戌葺大雄殿年復成鼓席順治戊戌

欽差司吏院張嘉謨賈

特皇帝敕書至報恩詔師以名香法衣尋以闕奏對稱旨

山庚子秋復禪師錫以京進號普濟能仁國師于世

尊成道日在阜城門外慈壽寺為千五百人說普

世

薩大戒又命弟子作佛事七晝夜畢辭還山

欽命遣官護送既歸乙巳夏五帖瞻戴君同諸紳士

請住於潛天目師子正禪寺於顏垣敗壁中

一彈指間煥乎金碧善權之請因樂安祖塔在彼

勉為一赴亦未嘗久留每歎曰趙州八祖行脚彼

何人哉乙卯春飄然北游時南谷穎冰藻復徹也

融羽宗振相隨因觸熱渡江止於清江浦慈雲庵

于八月初十日澡身跌坐說偈而逝壽六十二臘

四十三弟子等迎龕歸天目塔全身于東陽庵語

錄十二卷行世中和殿大學士王熙

京兆府丞戴京會各有銘而鐫碑

慧楨首座大名行孚於順治十五年報恩首座寮奉

塔僅十載於康熙四年示寂建塔于斷祖塔小布

水之西大覺祖是年入山親為起龕秉炬於六月

而為之記乃更今名係福建延平府將樂縣人俗

美發禪師

名行淳初字還樸因主報恩法席大覺老

西天目山志

卷二尊宿

長



姓熊父維城母陳氏年二十一投舅氏惺如公茆  
染浪杖人繼席壽昌遂納具焉癸未冬過博山遂  
誓云大事不明不出此堂逼拶四十餘日忽被面  
前堂馨一觸全身如在網羅中跳出時年二十七  
也戊子春至建康同與然緯公往大雄乞單入堂  
時祖方懸牌垂問云佛未出世時道將一句來師  
即抱牌入方丈云云和盤拓出祖云山僧今日困師  
便禮拜祖云汝者一轉語可作我維那每以趙州  
勘婆子白雲入磨房話詰之凡下語輒訴罵不已  
受拳踢最多一日復問師曰既是枯也枯得頌也  
頌得悟也有悟處因甚却道未是在師曰粉牌不着  
白祖曰說也說得是見也見得到只是未在師大  
疑叅究累日忽如雲開見日遂舉似老人云者回  
謾某甲不得也祖云更與你三臺掩關三載戊戌重  
難酬禮拜而出乙未冬游五臺掩關三載戊戌重  
歸報恩庚子秋侍大覺應詔西苑辛丑南旋乞  
假入閩葬親度夏蚌坑經行次忽憶百丈囑瀉山  
時節若至其理自彰之語驀然打失布袋盡大地  
不見有纖毫異相佛法世法打成一片時年四十  
五矣後出嶺舉似老人覺云茲與我江上水關契

證處符合乃徧謂入室弟子曰清西堂得中禪狀  
元汝輩落渠後也康熙乙巳夏侍祖入西天目重  
開師子正宗禪寺舉師立僧示眾丁未秋命住武  
康金山迎龕歸天目京兆戴公出遺書命師繼席江  
諸山丙辰冬復應壽聖之請戊午重主報恩已未九  
月初十日示寂後隴之左阜臘

骨巖禪師名行峯鳥程溫氏子幼業儒年二十一投  
人於報恩一日覺示眾云但向父母未生前薦得  
自然廣大圓滿師於言下知歸後於不勇公掌  
下頓開生面康熙己酉覺命師主席崇福覺示寂  
後兩主報恩丙辰冬來天目為大覺起龕于十二  
月十八日作入塔佛事已畢仍歸報恩至丁丑  
六月廿七日示寂壽七十有九塔于寺之左隴  
雲居禪師名行嶺江右臨江人叅大覺於報恩司樵  
覺哀毀過禮大衆亦封鍋覺垂示云我作那吒太  
子時如何師云樂則同懽覺合開鍋順治乙未荆

西天目祖山志 卷二 尊宿



谿諸檀越堅請大覺主磬山覺合師代為首眾至  
康熙八年已七十矣覺贈以偈曰年臻七十始開  
堂慣自將身入眾藏今日寶華王座上烏藤痛處  
好宣揚始得陞座開堂丁巳繼席天目方丈戊午  
大旱持益吳門歸次棲水示寂  
世壽八十二弟子建塔于磬山  
全庵禪師名行進錢唐沈氏子母胡氏生數月而孤  
十芟染天童密老和尚處受戒二十九叅大覺於  
報恩洞某甲生死不明求和尚開示覺曰將生死  
來與汝開示師茫然一住有遇林叟指叅金粟明年  
三月復住報恩從此一住有遇林叟指叅金粟明年  
朴痛下針錐戊子年覺寓荆山不退勇公為報恩  
堂司一眾賴以策發師以七終不得透徹流淚不  
止乃往證果庵研究七日有餘忽地春風大作打  
開門戶當下猛省值覺已回大雄趨往瞻禮覺一  
日垂示曰古人道休去歇去一念萬年去寒灰枯  
木去古廟香爐去一條白練去且道明甚麼邊事  
師同眾下語畢覺微云龍得水時添意氣虎逢山  
勢長威凜是汝道底師曰今日親見和尚覺令充

副寺辛亥覺命師上天目一夕諸兄弟同在文室  
因舉香嚴上樹話至虎頭處覺厲聲曰什麼虎  
頭上座狗頭上座師往昔礙膺之物豁然蕩盡遂  
當眾頌上樹話覺大可之後出世興化極樂院既  
荆溪海會庚申仲夏主天目辛未春應崇福請交  
南谷頴公住持天目自赴崇福康熙癸酉十一月  
初一日示寂于大雄關室世壽八十三  
臘六十四塔於天目陽和峯之麓焉

南谷禪師名超穎江寧上元張氏子年十六投本邑  
於磬山不契過報恩謁棲和尚棲舉一火燒却話  
示之未幾有省依止數載棲示寂大覺老人過報  
恩問云鐵蛇鑽入海撞倒須彌山你如何會師曰  
大家在者裏覺解頤遂以衣拂囑為棲嗣後侍覺  
最久康熙三十年歲辛未繼席天目至三十六年  
辭退復住磬山大雄等處于四十年甲申九月  
十四日說偈而逝塔於天  
目何佳塢荆門庵之右隴

形山禪師名超寶江右人得法苕溪慈翁禪師初住  
石門清隱繼住圓照泊杭之善慶康熙丁



丑中和朔接住西天目山師子正宗禪寺主席三  
年至三十九年庚辰正月退於善慶院 二月  
十七日示寂建塔  
於本山南庵之左

晦石禪師名超琦吳之長洲人俗姓曹父慎吾母金

康熙辛亥浙地大饑痛大覺遣爾謙至蘇抄募師得  
會晤聞舉臨濟三頓痛棒因緣遂決志出家次年  
正月入天目投大覺頓如開山祖打破拖死屍子  
食中夜上天殿禮佛頓如開山祖打破拖死屍子  
直得魂飛膽喪絕後再甦從上古德機緣默自領  
會時年二十一歲乃王子六月十三日也二十三  
圓具次年仍還天目東美祖于報恩凡四載為題  
頂相付之仍還天目東美祖于報恩凡四載為題  
至法身無相應物現形般若無知對緣而照覺從  
前悟境一時冰釋庚辰春繼席正宗禪寺至癸巳  
寺燬師經理修復煥然改觀常設三問以驗來學  
作四賓主辯別燈錄正其訛謬住持本山二十七  
年至雍正四年丙午五月建塔於剔燈庵之後  
壽七十五僧臘五十五

澹如禪師名明永新安俞氏子康熙庚辰投黃山雪

數載未蒙允可癸巳春守大覺祖塔早起推門忽  
覺身世俱忘因舉似翁翁曰若在祖師門下乃螢  
火之光也自是愈加精進忽于經行處憶得興化  
于大覺棒頭會得臨濟喫棒道理時年三十七矣  
乃舉似翁翁曰臺山婆子我為汝勘破了也那里  
是勘破處師云趙州亦被某甲勘破了翁曰向甚處  
勘破師一喝便出復呈頌云臺山婆子放憨癡趙  
老重栽眼上眉明暗兩條來往路得便宜處落便  
宜翁曰放汝三十棒師云恩大難酬雍正丁酉命  
分座丙午翁退居蒙堂命師繼席本寺翁寂師守  
龕理院事辛亥退守翁塔于剔燈庵甲寅織造隆  
公昇請住西湖聖因寺至壬戌退居花塢樹雪林  
乙丑重主天目庚午二月八日示微疾以手書招  
逝時二月十三日也世壽七十  
三臘五十一塔于本山楊樹坂

松溪禪師名明壽字文慧揚州寶應沈氏子母徐氏

西天目山志卷二 尊宿 觀音院怡然師薙染年二



十至京師愍忠寺受具依金陵寶華山松隱和尚  
習律康熙丁亥登天目叅晦翁時以圓覺普眼章  
叅究次年坐夏豁然徹見普眼意旨辛丑始受記  
茹師貌嚴毅寡言笑聲如洪鐘維那十載辛亥正  
月二十四日推主本寺方丈癸丑十月

世宗憲皇帝

欽賜禪源寺及傳燈心印二額并  
御祭大覺國師祭文禮塔前至乾隆六年辛酉退居

懸天王殿一懸大覺塔前至乾隆六年辛酉退居  
別燈庵甲子冬示微疾三十日呼湯沐浴披衣端

坐而寂世壽六十三夏四十三塔干  
陽和峯麓全庵和尚率堵波之右

契宗禪師 名明旨姑蘇人氏族無考投天目晦翁和  
尚為之剃髮久而乃得授衣法乾隆六年

主席禪源方丈甲子秋退居瓶窰丙  
子五月十九入寂靈蛻迎歸普同塔

無學禪師 名明用北直隸順天人叅晦翁於天目職  
任西堂貌溫順天體修偉力究斯道久乃廓

悟始囑法焉乾隆壬申繼席於癸酉  
正月二十四日趨寂歸普同之中塔

有于禪師 名實成金陵上元人俗姓趙母鄭氏年十  
九投本邑海會庵機顯老師薙染二十一年

受戒即叅晦翁於天目翁問甚處來師云弁山翁  
曰你為甚學得許多佛法師愕然不能對自思行

頓原為學佛法因甚道學得許多佛法因此疑情  
頓發雍正丙午夏翁示寂遂下山徧扣叢席竟無

可其意者甲寅淡和尚主西湖聖因始決志叅叩  
一日尚問汝在外多年有甚見處師呈本來面目

頌尚笑曰自了可矣乙丑隨尚復住天目命師綱  
維尚垂問盡大地是箇火坑得何三昧不被燒却

師出云謾某甲不得尚云你作麼生會師云據虎  
頭收虎尾尚橫點首曰不是不是何不向第一句

下明宗旨師自此機辯穎脫丁卯夏住天長庚午  
春尚示寂召師守龕壬申秋塔工竣即退居雲峯

庵甲戌杭城檀信將華嚴妙總德一三院舊址請  
師創建開法為天華寺于乾隆己卯年九月二十

六日示寂世壽五十七夏  
三十八塔建于龍駒鳴

聞學禪師 名實定松江上海縣人俗姓張年二十父  
母俱喪遂往天台山出家萬年寺納戒於



湖州萬壽寺進堂擡頭見心空及第匾額爽然自  
失閱六祖壇經如獲故物尋至杭州叅淡如和尚  
於南高峯頂問一歸何處師曰南高峯頂浪滔天尚  
日騰空嶺雲霧四塞忽見日輪涌出身心廓然夙  
疑冰釋再至聖因呈白澹如和尚輒蒙印可乾隆  
十八年癸酉主席禪源寺丙子孟夏退居蒙堂已  
而歷住越之吉祥江陰之香山蘇之華藏文星流  
水居等處至丁酉正月三日書偈曰繼祖傳燈接  
虛響說法開堂鬼打羅鼻孔今朝枯正了蓮花池  
上見彌陀偈畢寂然眾呼之已逝矣  
壽六十七夏四十四塔於白果灣

**桂巖禪師** 名實立楚之沔陽州人行實未詳叅澹如  
請住蕭邑龕山東林寺開法建立叢林接眾安禪  
乾隆丙子夏主席天目於戊寅二月朔示寂闍維  
後建塔于太子庵  
前隴而藏蛻焉

**道謙禪師** 名實智江右建昌府新城縣人俗姓楊父  
居鐸母孔氏乾隆元年叅澹如和尚於聖

因當日維那以師年輕不肯送單尚曰不要欺他  
却也有些古怪費和尚許多唇舌方得進堂乃發  
憤叅究得旨後機語迅捷莫敢攪其鋒者復隨尚  
入天目監院十有餘年乾隆戊寅繼席禪源已卯  
退居守國師塔邑之紳士請住資聖寺未幾仍還  
東陽塔院癸巳中夏入寂建塔於攢玉峯之麓自  
述塔銘曰建塔侍祖塔徧界風颯颯誰解捋  
虎鬚蓮花開歲臘所著行脚銘鐫石傳世

**梵音禪師** 名實裕南直隸通州人俗姓王父祖為母  
薙髮二十歲金陵寶華山受戒習律五載聞天目  
乃高峯祖師得道處特來禮觀時松溪和尚主席  
機語契合遂蒙記蒞師狀貌魁梧音聲洪亮見者  
悅服在寺綱維有年於乾隆己卯請住禪源方丈  
至丁亥仲秋退歸通州壬辰四月十九日西逝壽  
六十九夏四十九弟子等迎請遺骸入於中塔

**峻極禪師** 名實鑑錢江顧氏族父有隣母郭氏年二  
冬于金陵慧居寺圓具王戌叅松溪和尚於天目  
尚乃問獅子窟中無異獸因甚有猴子師答云凡



聖交參癸亥春往天台九華詢歷知識咨決心要  
甲子復登天目得授衣拂是冬尚乃示寂乙丑往  
南高峯結茅丙寅至潤州江天七峯閣掩關一日  
忽見梅花爛然廓爾穎脫遂頌云久歷寒巖凍羣  
陰剝盡來春風纔拂面獨占百花魁方丈至關勘  
問云無夢無想主人公在甚麼處師曰對面不識  
又問八角磨盤空裏轉意旨如何師曰珊瑚枝枝  
撐着月復為呈頌一眾為之助喜期滿仍回南高  
峯茅蓬住靜埋光剗彩十餘載不歷市塵已卯眾  
請下山住月塘古剎因病退居梵嚴靜室丁亥秋  
仲主席天目辛卯退歸甲午開法明州五峰寺已  
亥再住禪源至壬寅八月三十日披衣跌坐而逝  
世壽六十三夏四十二  
塔於半山橋之右隴

巨源禪師

名際海江寧韓氏子父彝章母周氏始八  
齡于祖堂德成師落髮二十歲往古林智  
彬律師所秉戒丙子謁有于和尚於天華一見機  
契乃許入室後游天台九間廊喫懶有省曰且喜  
眉毛在眼上王午繼住天華昔日有于和尚開法  
僅三破院勉為安禪皆頽垣敗壁既而師乃續建

一新始成叢席乾隆辛卯來主祖庭癸巳退回天  
華丙申復住天目已亥五月卸院事歸休滿覺庵  
于七月十一日示寂壽四十九  
夏二十九塔于龍駒鳴之陽

旅亭禪師

名際會嘉禾張氏子年十六投大聖寺見  
融師落髮年二十向嵎縣普安寺圓具乾  
隆己巳往大雄崇福結冬聞兩聲有省至天目謁  
淡如和尚尚問那里來師云大雄山來尚云如何  
是諸佛出身處師云萬人退望處紅日到中庭尚  
云那里學得來師云今日親見和尚云參堂去  
師應聲便出泊淡翁入寂得法聞學和尚癸巳住  
席天目甫及一載退居西方庵後往蘇遂留居文  
星閣辛丑六月二十七日示寂壽六十  
二夏四十二閣維後歸天目普同塔

鏡中禪師

名際和禹航人俗姓董投天目淡如和尚  
披緇受具於桂巖和尚住祖山時乃得衣  
拂乾隆二十五年主席龕山東林因病歸天目乙  
未春住持本寺一年旋退別室茲後不染世緣勤  
修白業于甲辰二月十一日沐浴更衣焚  
香禮佛已面西端坐合掌化去入普同塔



西天目山志卷二  
文遠禪師 名際月秀水沈氏子父瑞林母邱氏年十  
九在月塘寺苋染明年冬古崇福受戒初  
謁天長不契上天台萬年將一載毫無入處乃往  
南高峰參先和尚尚問父母未生前如何是你本  
來面目面赤不能答自此疑情頓發寢食皆忘至  
第三夜靜經行次忽聞門外虎聲廓然有省給侍  
老人最久甲午隨尚至明州五峯開法乙未冬遂  
命繼席庚子退居竺峯時尚復住天目招師回山  
壬寅尚示寂遺命守龕乙巳秋退居別室壬子冬  
下杭至孝慈感微疾于十一月二十四日談笑如  
常莞爾趨寂世壽五十六  
臘三十七闍維入普同塔

參請

學以類聚聖無常師方天目父子兄弟爐鞴  
鼎紅凡太阿之欲倚天者靡不就冶以思鑄  
耳雖曰神器有歸而痛割鉗鎚已露布矣志

參請

元

清琪禪師 字石屋常熟人依興教永惟出家一日有  
高峯和尚汝可偕行否師欣然與之見高峯峯問  
汝爲何來師曰欲求大法峯曰大法豈易求哉須  
然指香可也師曰某甲今日親見和尚大法豈有  
隱乎峯默契之授以萬法歸一之語服勤三年忽  
辭他行峯曰溫有瞎驢准有及菴宜往見之師至  
建陽西峯見及菴菴問何來曰天目問有何指示  
曰萬法歸一問汝作麼生會無語菴曰此是死句  
不得住無佛處急走過意旨如何師答不契菴曰  
者個亦是死句師不覺汗下後六年途中忽舉首  
見風亭豁  
然有省

大同禪師 字一雲號別峯上虞王氏子初依會稽崇  
勝寺會春谷講經景德師往依之凡清涼



一家疏章悉攝其會通而領其樞要義趣消融智  
光發現識者心服之俄上天目依普應本國師久  
之普應謂曰賢首之宗日遠日微矣子之器量足  
以張大之母久淹乎此也為贊清涼像而遣之師  
喜曰吾今始知萬法皆本一心不識  
孰為禪那孰為教乘內外自此空矣

崇裕禪師

字約之毘陵人陳氏子初從壽昌東林曉  
義公公授以萬法歸一語師淬礪益力雖金牆鐵  
壁必欲拓開乃已佛慧亦期師有立所以警發者  
甚至居三年師急於求證復走中天竺廣智訶公  
公舉臨濟無位真人之言詰之曰爾還知否師不  
覺下拜智曰你何所見而作禮耶師曰拜者非是  
他人智曰從門入者豈是家珍耶師曰和尚慎毋  
欺人也智首肯之

世愚禪師 字傑峯幼入蘭溪之顯教謁古崖純石門  
江而西涉天目時布衲雍公斷崖義公中峯本公  
大宏雪巖高峯之道師一一咨扣親炙久之復謁

正遠禪師

號一關番陽方氏初參晦機于淨慈問甚  
瞪目不見底機曰恁麼則浸爛衲僧鼻孔也師曰  
終不借和尚鼻孔出氣機曰畢竟向甚麼處出氣  
師曰恭惟和尚萬福機肯之逾  
二年往依天目中峯和尚輪下

大慈止巖成公公曰不是心不是佛不是物是何  
物師聞愈疑仍還類氣絕之人唯一念歷然一夕  
至夜分聞僧唱證道歌云不除妄想不求真處豁  
然如釋重負喜曰佛法元在目前祇為太近故人  
自遠之耳

智及禪師

字以中號西麓吳縣人聽賢首家講法界  
觀未終章笑而去謁廣智微露文采智大  
驚有嶼上人者呵曰子才俊爽不思負大法甘作  
詩騷奴僕乎無盡燈偈所謂黃葉飄飄者何謂也  
師舌噤不能答即歸受業院胸中如礙巨石者踰  
月忽見秋葉飛墜于庭瞥然有省乃走證徑山復  
依承中峯和尚故和尚  
泊子昂書中每見之



榮枯木禪師 朝人也首事海會梅峯壽公澄神禪觀  
衲雍皆服勤禮懇  
受其策發者良多

守貴禪師 字無用號水菴浦江人十八入康侯山為

之師弗樂二十翻然往浙西日以問道為事禮干  
巖長公授以向上機冥叅默究恍若有契乃登  
天目依中峯本公斷崖義公反覆扣答既而天  
息曰干江雖殊而明月則一吾今後無疑矣

永寧禪師 字一源淮東人出游浙河見諸大老無所

叱出之久而許入見問何處人師曰通州曰淮海  
近日盈虛若何師曰沃日滔天不存涓滴曰不著  
槽道師曰請和尚道公便喝師退不寐一旦聞舉  
雲門一念不起聲未絕而有省公以斷崖和尚所  
贊已像署一花字授師曰汝緣在浙師遂還時天  
目勾住本公天如則公據名山展化儀師往扣擊  
道相脗合而幼  
住獨譽師弗置

鐵印機禪師 荆南人 指堂月禪師 冀北人 無方遠禪師 南

無念護禪師 雲南人並英靈卓

比邱尼普貴 字無為因夫主忠愍公使日本死於王

其性妙之旨至治二年七月朔跌坐而逝闍維之  
獲五色舍利斷石為窆塚葬焉其男名都中由兩  
浙漕使轉福建道都元帥一日奠於筵有折山丹  
花于餅者俄結一物如杯玉雪瑩然人咸異之

比邱尼楊妙錫 宋宮人也奉老子教為女冠居錢唐

父母患之楊識和尚非器論其父母合出家及  
和尚祝髮又助僧牒衣具且求所祝之髮少許貯  
以香函供於靜室越數年有舍利生於髮久而益  
多積至五十餘顆五色晶瑩楊自是易所學以學  
佛乞為比邱尼終焉元統甲戌冬  
屬僧月指者塔髮舍利于雲居庵

國朝



山曉禪師 名本哲叅大覺國師于萬善殿出問云兩

審昔日是今日是覺舉杖作打勢云恁麼則放

穎庵禪師 名行嶼叅大覺覺云苦薩子來也師禮拜

有和尚又着向甚麼處覺云情知拈不出師曰似

如擊塗毒鼓解虎項鈴雖是好手未為作家總不

恁麼又且如何覺云近前來與汝道師

日愚者不及智者過之覺云自領去

純如禪師 名行咨問大覺云三要印開朱點窄則且

前來與汝三十棒了也師便喝覺云好喝遲了八

刻師曰恁麼則峯頭霜夜月任運落千溪覺云輕

輕擲一鈞錦 鱗衝浪飛

退庵禪師 名行重九江彭氏子幼喪母隨父出家於

監寺事一日呈拈花頌云倚天長劒露鋒銚拈出

何人敢近傍老倒飲光輕觸着面門血濺太郎當

覺云只見錐頭利不見鑿頭方師云却被和尚看

破覺面壁云誰人知此意令我憶龐公師遂出

白松禪師 名行豐山西人叅大覺老人一日覺問盡

金不博金水不洗水覺云我問你盡大地是個火

坑得何三昧不被燒却師云盡大地是個火坑某

甲亦如是覺舉拄杖云你喚者個作火又喚

甚麼作拄杖師云和尚惜取眉毛覺便打

不退禪師 名行勇錢唐韓氏子自幼好佛至年二十

禮衍雲披削偕全庵進公叅大覺老人力究父母

未生前話因同眾普請見僧荷空畚行有省一日

侍次覺問僧轉山河大地歸自己則易轉自己歸

山河大地則難如何會師從旁徹法源底然猶脇

不至席朝夕叅請日臻元奧覺謂師得地之後廢

棲雲禪師 名行岳烏程沈氏子少補廩庠以居士身

叅大覺老人後即投覺芟染一日問覺空

江陰敵山中灣

西天目祖山志 卷二 叅請



西天目祖山志卷二  
索索地錦豔豔錦豔地空索索時如何覺云待  
你到此境界與汝道師禮謝覺云者漢多時妄想  
今日始斷師有省  
後覺命繼席報恩

來雲禪師

名行巖湖州菱湖潘氏子與棲雲同投犬  
問云婆子燒菴時為者僧出得什麼語師云好  
不得好報又問如何是不動尊師云活潑潑地覺  
云何不道朝到西天暮歸東土師禮拜云和尚證  
明有僧問師云既是師子正宗為甚主山偏向師  
云謙則皆吉後主崇福示

寂塔于大雄山之南澗

茆溪禪師

名行森惠州博羅黎氏子骨相清奇性情  
天放甫壯聞鐘聲有省依歸宗保禪師  
雍落往叅雪嶠和尚繼叅大覺老人於崇福覺合  
作本來面目頌師云茗溪寂寂水潺潺萬疊層巒  
一境閒乍雨乍晴雲散合滿天風月到人間覺云  
好與三十棒師云恩大難酬夏滿即說偈印可命  
分座報恩崇福兩山師復手開龍溪庵為禪悅晏  
休之所後賜額圓照寺同叅問如何是首座家

風師云沒籬沒壁叅云忽遇賊來時作麼生師云  
憑你摸索順治十六年己亥  
召師入萬善殿備顧問奏對稱  
旨屢降  
御墨錫賚優渥一日

上問海

底泥牛卸月走巖前石虎抱兒眠鐵蛇鑽入  
金剛眼崑崙騎象驚牽意旨如何師云行森曾  
到天眼來後應斷之老祖繼住崇福因愛吳山華  
嚴蘭若幽僻遂棲止焉示寂之日說偈辭世封龕  
擲筆含笑而化迎龕歸圓照塔於寺右而瘞焉

寂菴禪師

名行洽汝州光邑王氏子孤苦絕塵矢志  
萬行到處陸沉眾中尤行業純謹後叅大  
覺老人示以未生前話每徵詰師無對覺云你恁  
麼叅禪水也消不得師直得垂淚同眾坐不臥七  
覺問什麼物恁麼坐師云總沒交涉覺便打師無  
語覺痛打一頓中夜釋然舉似覺覺領之後示寂  
於大雄棲賢堂火化齒牙不壞色愈光澤與退  
菴重合塔於報恩大覺璉禪師之放生潭上

蘊荆禪師

名行壁楚人叅大覺老入真切體究未嘗  
輕發躁露因坐精進三次日上方丈謂覺



曰某有個見處覺曰狗子因甚無佛性師拳覺助  
下云向在趙州處落節今日要和尚處拔本覺便  
推出次日復上方丈覺云盡大地火發得何三昧  
不被燒却師云特來度夏覺便喝師呈偈云圓似  
滿月圓寬同太虛寬厯劫無姓字從來絕躋攀聖  
凡由此出剎海任伊安始終無變異觸處善隨緣  
覺云還會適來一喝麼師便出師土木形骸悟  
處穎脫後竟不知所終蓋若西山之流亞歟  
**慧樞禪師** 名行地畿南劉氏子十五而孤事母至孝  
州之清淨庵薙染庵衆惟專淨業因思前僧所示  
叅禪方了生死遂策杖南詢首謁天童密老和尚  
刻苦叅究至忘寢食忽有省宏覺禪師繼席天童  
遂納具復叅大覺老人一日問如何是正法眼藏  
師云覲面不相瞞覺云作家禪客師云不得塗污  
人好覺云近日禪客少且去喫茶師便出一日覺  
舉百丈卷席話問師師便作掀禪牀勢覺云汝見  
個甚麼道理師云看者老漢納敗闕覺連棒打出  
師從前膺礙一時冰釋自是機辯敏捷覺印可之  
因省母北歸勸母出家納戒得西山宏教寺舊址

遂棲止焉後侍大覺應詔西苑  
敕賜法海禪寺康熙丙午示寂建塔寺側

**濟芝禪師** 名行覺四明王氏子幼孤苦及長每思世  
演金剛般若即猛念生死決志出塵年二十有二

遂投大覺老人剃染令叅父母未生前話一日入  
室請益無夢無想無見無聞話聲未絕連棒打出  
師當下豁然丁巳春請主崇福于庚申閏八月廿  
二日坐脫建塔於大覺  
老人衣鉢塔之右瘞焉

**六解禪師** 名行恒江陰劉氏子弱冠受業於邑之乾  
未生前話因進具聞隣僧受食孟鉢作聲忽然身

心踴躍即入室白磬山山曰試道來師擬對山驀  
掩師口云道盡西江水話下語不契值渡錢唐  
老人舉一口吸盡西江一口直吞乾蝦蟹魚龍命已安  
江有省頌云西江一口直吞乾蝦蟹魚龍命已安  
大丈夫兒全意氣不從今日肚皮寬後受夾山竹  
林寺詩一住九載復住雲陽嘉山寺入寂  
於潤州八公洞漢隱菴塔全身于菴之右



**慧濟禪師** 名行舟世籍淮安叅大覺老人一日坐禪

覺云盡大地是個火坑得何三昧不被燒却師便

出覺云你見個什麼道理恁麼答後蒙印可歸淮住

道理和尚恁麼問某甲恁麼答後蒙印可歸淮住

彌勒院年七十再上天目覺命分座為眾宏演毘

尼康熙辛酉繼席崇福未期年而逝世

壽八十一塔於大覺老人衣鉢塔之左

**道仁禪師** 名行本新安人叅大覺老人呈二頌覺因

粥飯家常話以水相澆水一拈花頌云佛法本無法

佛頌云左山右水露堂堂默付密傳豈商量悟者

方知人骨髓難把虛空作斗量覺謂師本不嫻文

墨以水澆水四字却搔着山僧癢處發明昔日事

却甚相當復召師問云你在靈山見世尊拈花時

如何師云是他敗闕覺乃豎拂云大眾道道看良

久云一絲寒撒千峯外漢漠魚龍動地雷

師後開法于新安之小華山石塔猶存焉

**古箬禪師** 名行卓世居漢陽西鄉張氏子幼孤母姨

撫育成立年十三投江夏修靜寺湛白禪

宿薙落二十受具涉講肆繼叅大覺老人坐精進

七發明已事侍老人應 詔入京

世祖見師誠篤每膺 重錫還山後歸省母姨漢上

諸檀構妙法菴以奉 師不出戶闕者三十年為一

方緇白所重示寂日弟子輩請留偈以警世乃說

偈云無死無生法界寬灰頭土面月湖邊要知從

上拈花旨好向瞎驢脚下看遂沐浴更

衣端坐而逝城西青龍之左建塔焉

**曉雲禪師** 名行謀楚人叅大覺老人發明已事庚子

師出問曰口吞佛 詔侍大覺入京於萬善殿陞座

甚却在千峯頂上覺云正要闍黎恁麼舉師云直

得宗風永振萬類瞻依覺云過道塲圓滿陞座師

又出問昔日趙州今朝和尚覺便喝師云有所譽

者有所試矣覺云被你和尚覺便喝師云有所譽

却是行謀罪過歸楚未及出世而逝

**響雪禪師** 名行澄蘇之長洲人投大覺老人薙染覺

賣弄不少一日問師如何是三十年不少鹽醬師云

覺遂休



仰巖禪師 名行荷世居虎林大覺老人念其捨家室

平國王長壽話師云某則云東反西亂覺領之

琴水禪師 名行韶世籍金臺久歷講筵叅大覺老人

問因甚頭角四蹄多過了尾巴過不得師云坐斷

十方猶點額密移一步看飛龍覺印之以偈有教

河深入不涇脚禪域窮幽見日枯之句後歸金臺示寂昌化寺

化昱禪師 名明啟號覽雲江蘇通州海門人族陸氏

師薙髮年二十歲在如臯大覺林受戒後歷叅名

宿至天目謁晦翁翁問那里人師云揚州翁曰揚

州瓊花枯來看師無語翁云叅堂去師疑情頓發

衣拂戊午春如臯紳士請師住菩提院開法甲

戊春示疾至十四日沐浴更衣而逝塔於殿側

克復首座 名明理彭城人叅晦翁於天目機契乃記

忽作幾有平地起骨堆之慘彼時又珍李公為兩

浙督撫與師交厚因往謁陳曲情即為懲治寺賴

以安後老于本寺

一乘都監 名明元山右平陽府人未詳里族有膂力

躬行不怠泊翁入寂歸隱無門老菴即黃龍開道

者駐錫之處本寺虛席屢請不至世壽七十四而

寂塔于菴側法嗣實真字心珠住大覺寺西院實

正字履端創建西蓮靜室以居先後相繼皆逝因

先師愍彼無傳代為付囑二人一名際傳字道德

續心珠下一名際慧字普明續履端下皆能輝煌

佛宇紹隆法化者也

在衡禪師 名實權海寧錢氏子依天台道源和尚披

一日聞榔聲打失鼻孔茲承印可後住杭之聖果

南屏天台之華頂京都之興勝諸刹乾隆己丑五

月二十九日示寂塔歸華頂之西陽



敏德禪師

名實輝潛陽人族謝氏父勝湖母徐雍正

乙巳臘月六日生

碧眼豐頤意誠言寡年

二十一年

投本寺聞復師茂染昭慶受具乾隆二十

七年

監院事立湧蓮菴為上院接待方來置長溪

之資至癸丑二月十九日歸寂世壽六十有九

禮懺

受業之師也

智輪禪師名際照明州慈谿人依先師剃髮于昭慶

智輪禪師

名際照明州慈谿人依先師剃髮于昭慶

關除荆莽縛茹以居木食草衣晝夜行道感洪堯

先師開法宏演毘尼復交文遠兄接理遂得閉關

力究斯旨因文公退歸天目始領院事繼席數載

而逝塔于五

雲松首座

名際林山陰沈氏子青霞公之裔也母何

乙酉冬來山納戒丁亥先師甫住祖山一見知非

漏器便許入室復不惜芒鞋徧扣名宿機辯通利

幾如水銀瀉地無到不圓迨老人再住天目指多

事劇命理院務推誠布公俾賢愚莫不各饜其願

三十餘載以祖下即界濫承祖席已歷二十餘霜

不在大覺老祖下即界濫承祖席已歷二十餘霜

安胥賴伊之力也

道源禪師名際信係文遠和尚胞弟依仁和月塘寺

道源禪師

名際信係文遠和尚胞弟依仁和月塘寺

守約性相二宗無不融貫時理安之智朗天長之

守約性相二宗無不融貫時理安之智朗天長之

少隨先師於天目雖職一勞苦而已躬下事未嘗

少隨先師於天目雖職一勞苦而已躬下事未嘗

啓煉魔禪期策發象龍多所獲益復應禹航龍泉

啓煉魔禪期策發象龍多所獲益復應禹航龍泉

四日辭世

壽六十有一

普道禪師

名際清乃雲松首座同母弟也乾隆己丑

祖塔因往參扣機契得受法印後住臨安福勝方

祖塔因往參扣機契得受法印後住臨安福勝方

丈居六年入寂世壽五十一臘二十九闍維靈蛻

丈居六年入寂世壽五十一臘二十九闍維靈蛻



仍歸天目  
普同塔

迎羅禪師 名際燦潤州金壇人于景陽菴薙髮毘陵天寧寺秉具乾隆丁亥隨先老人于天目

得授法偈後出世明州五峯一載旋歸祖山即感微疾逾月而逝

誠一禪師 名際念姚江徐氏子投武林忠清里水陸寺出家寺古圯止數椽聊蔽風雨因苦

志募建俄成寶坊先師為之記荊惜年不永四十四齡棄世瘞半山之麓

源委

叅到不疑之地傳將無盡之燈克大其家實繁有衆山之尊宿在唐宋顛多流寓樹剎開堂自高峯妙始丕承哉獅巖烈也志源委

南嶽第五世臨濟元六世興化獎七世寶應顛八世風穴沼九世首山念十世汾陽昭十一世石霜圓十二世楊岐會十三世白雲端十四世五祖演十五世圓悟勤十六世虎丘隆十七世應庵華十八世密庵傑十九世破庵先二十世無準範二十一世雪巖欽二十二世天目高峯妙。



二十三世 二十四世 二十五世 二十六世 二十七世

中峯本。千巖長。萬峯蔚。寶藏持。東明岳。

斷崖義 頑石瑱 天龍貴  
布衲雍 南詔鑑 松隱然  
空中假 古先原 清隱馨  
華山昌

天如則

二十八世 二十九世 三十世 三十一世 三十二世

海舟慈。寶峯瑄。天琦瑞。無聞聰。笑巖寶。

三十三世 三十四世 三十五世 三十六世

幻有傳。天隱修。玉林琇。美發滄。

密雲悟 箬庵問

雪嶠信 林臯豫

抱樸蓮 山茨際

松際授

骨巖峯 慧樞地  
雲居嶺 濟芝覺  
全庵進 量空寬  
退庵重 慧濟舟  
白松豐 道仁本  
不退勇 古箬卓  
棲雲岳 本一如  
來雲巖 曉雲謀  
芾溪森 宏濟演  
寂庵洽 響雪澄  
德巖紹 仰巖荷  
蘊荆壁 琴水韶  
慧楨孚 息心偉  
六解恒

棲雲岳。南谷穎

芾溪森。彤山寶

出世稟承 白眉貞  
徹也融



三十七世

三十八世

三十九世

晦石琦 澹如永

曹水源

冰機節

師鑒梵

錦堂暄

宗辨學

思省佑

己南演

雪鏡悅

卓崖稟

似蓮崇

語松裕

宗蔭燈

雪艇楫

仁中閻

木庵朗

鐵庵訥

松溪壽

契宗旨

無學用

一乘元

海山宗

化昞啓

克復理

西東神

指柏正

閻雲雯

有于成

聞學定

桂巖立

道謙智

在衡權

毓青蓮

聖聞性

法榛鏡

瑞峯

梵音裕

峻極鑑

穎悟元

自存養

四十世

文光燦

珪璋天

巨源海

省堂

得傳

旅亭會

應中道

洪濟度

遠塵堂

慧超達

鏡中和

策修

普道清

本當淨

靈默智 聖心達 靈庵徹

道源信 雲松林 誠一念 指行信 寂照通 雲開日 碧月靜 雲呂慧 聞徹音 智量印 道堂合 恒舒輝 增明輝 自源昌 體周界

省源徹 達本源 秋蕃蓮

論曰吾聞報顯依正美臚德功固畸為重矣然行脚則空遇不妨奪境而留人住山則問賢更慮有



西天目山志卷二  
堂而無佛有爲之事無漏之修皆僧梵之所莊嚴  
故足寶也是以古刹名藍雖罹兵燹而旣毀旋建  
且有後之金碧勝於前之塗聖者非至人能於毫  
端現寶王刹而長者肯於唐肆布金哉法繇人興  
蓋自古識之矣雖然惟雲構乃招哲匠獅窟始容  
大聲古之尊宿如黃蘗大梅雲門雪竇多以地名  
相與共傳不朽天目之中峯豈非最著者歟其他  
載之碑記不與刹竿爲存亡者又可勝言哉故自  
來謂藜林有禪之龍律之虎教之獅象焉有淨住  
之正鵠生緣之鳳雛受山之青藍過化循方之閒

雲野鶴焉靈傑相因信不誣也然吾又聞諸法以  
慈悲喜捨爲家常行住坐臥爲佛事大圓滿覺爲  
伽藍森羅萬象爲海衆如是則禪律教之與淨住  
而生緣等靡不以萬行資持五燈涉八爲高明博  
大之天目矣







